

童山文集補遺

三





叢書集成

初編

主編者
王雲五

商務印書館發行

童

中華民國二十五年六月初版

撰 者 李 調 元

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

王雲五主編
叢書集成初編
山 文 遺 冊
補 三

集

商

童山文集卷十五

祭文

祭叔其勝文

嗚呼。士農敦本。舊傳吾族。不有耕者。何以能讀。羅江科名。我父開先。不有襄者。何以獨賢。譬諸齒唇。亡寒相護。譬諸手足。抑搔相顧。自英華公。創立田園。吾父帶經。吾叔駕轅。自登籍後。定省是缺。吾父彈冠。吾叔守業。以此成家。內憂無他。不逾十年。甲第巍峨。以此裕後。漁獵經史。子姪四人。昆仲繼美。凡此之類。皆叔之勳。憐其辛苦。無以報功。自弟出繼。感叔仁慈。天啓繼體。錫以麟兒。自父之亡。推叔之壽。七十古稀。共樂林囿。自鼎待官。貤叔以封。仰惟孝友。火藻華蟲。自姪歸里。跬步不出。酒食過從。晨夕穆穆。謂叔碩德。掉頤無愆。豈知溘逝。丹旆翩翩。自叔之病。姪在什邡。聞訃奔歸。叔已殮藏。聞叔之亡。屢念七弟。感叔託言。酸鼻泗涕。今當歸窆。姪在台山。望靈而慟。促駕來還。今當撤奠。姪具錢帛。撫棺而祭。神其來格。嗟叔無憂。有子克荷。喪不失禮。稱家無墮。嗟叔無歎。有姪立傳。光輝宗譜。是鼎書勸。東至普陀。北至幽燕。人跡不到。叔已往還。片帆巫峽。疋馬建昌。人力不能。叔已身嘗。躬受褒封。非子寵錫。笞兒老翁。其誰能及。老始得子。又屆成人。白髮諸兄。其誰效顰。嗚呼我叔。可以無愧。倘是姪言。含笑一醉。

祭叔香如文

嗚呼我叔其果亡兮。歲在龍蛇。賢人傷兮。乘彼白雲。在帝京兮。山川險阻。望歸航兮。自春啓輻。經徐揚兮。江湖多風。逆水搶兮。木葉既下。波濤狂兮。巫峽猿啼。霧蒼蒼兮。兩蛟夾舟。如飛翔兮。闌風伏雨。殆備嘗兮。屠維作噩。乃還鄉兮。望見丹旆。涕泗滂兮。山頽木壞。吾安望兮。嗚呼我叔。理學希兮。模言楷行。世所推兮。豈惟猶子。實我師兮。予方垂髫。事戲嬉兮。夏楚二物。收其威兮。得紫香囊。立焚之兮。蚯蚓蟠龍。謂能詩兮。千里之駒。舍其誰兮。床頭周易。剖析微兮。春蠶食葉。借試闌兮。若有一个。先得驪兮。宰予朽木。乃追隨兮。柳不染衣。爲神談兮。扁舟南下。浪如雷兮。我父宰姚。在會稽兮。祕圖聚首。年甫期兮。遭祖哀訴。賦離駒兮。嗚呼我叔。孝達天兮。乍浦俶裝。刻日還兮。鳳嶺雞頭。虎守關兮。月黑杆斷。墮叢巒兮。前棧忽明。若有神兮。撫棺大慟。血杜鵑兮。墓道旣成。乃養親兮。豈無百忍。食指繁兮。卜宅西偏。創業難兮。祖母承歡。孟光賢兮。繼又登遐。孝如前兮。兩飲我父。慰黃泉兮。維叔之孝。人共傳兮。嗚呼我叔。善教子兮。擬之賈玘。猶逾彼兮。鼎弟總角。患學弛兮。鄉塾擇師。無可恃兮。吳越之遊。實爲此兮。海寧梧岡。授經始兮。石室登薦。名雀起兮。戊戌傳臚。三甲峙兮。遂登瀛洲。授太史兮。驥弟好學。不窺帷叶兮。叔恐稍惰。同襍被兮。遂掇巍科。如摘髭叶兮。甲辰金榜。並拖紫兮。同袍青瑣。世無比兮。本弟雖遲。折桂蕊兮。人稱三鳳。實無恥兮。揚名顯親。固其所叶兮。不有此喬。安有梓兮。未竟之志。克續似兮。錫之儒林。如身仕兮。知叔含笑。瞑目喜兮。嗚呼我叔。遭非苟兮。乾隆八十。逢國壽兮。大宴乾清。宴千叟兮。天子珍從。客黃耆兮。諸王捧罍。酌大斗兮。金盤玉筋。大官卣兮。腐儒飽飫。恩詎偶兮。天子曰否。爾其受兮。錫爾鳩杖。拄爾手兮。摩尼磁帶。鏘趨走兮。緞綾綢紗。製

汝手兮。洋盤螺爵。盛旨酒兮。貴陽皮盃。滑醅滃兮。貂蟬之子。子孫寶兮。凡百如意。惟爾取兮。再拜稽首。天寵厚兮。臣雖不文。敢或後兮。恭紀詩章。十二首兮。維時我蜀。孰獲剖兮。周燾劉成天及李俊後。四皓有兮。如此被寵。誰比醜兮。知叔九原。願世守兮。嗚呼我叔。何竟仙兮。誥綬初新。閭盈軒兮。一門華轂。玉樹駢兮。非叔陰德。報何綿兮。況皆侍從。或宰官兮。祿養重重。福無邊兮。叔于其間。享延年兮。胡爲羽化。適當年兮。致拋家累。隔幽燕兮。室如懸罄。其孰憐兮。孟季頗幹。扶歸棺兮。仲也文弱。告述遭兮。飄蕩兩粵。幸身全兮。先後回綿。心乃寬兮。嗚呼我叔。其知姪兮。自登仕籍。多磨折兮。豈惟人排。亦自失兮。幸贖身歸。守蓬蓽兮。又遭運舛。孽可活兮。陽膚不矜。屈刀筆兮。賊崽音斛濁。人或譎兮。似讖而非。十鎰沒兮。因之杜門。跬不出兮。便欲入山。一披髮兮。子息尙稚。孰提挈兮。仙能忍辱。卽爲佛兮。巧任人爲。但守拙兮。樓有萬卷。日披閱兮。豈曰著書。亦或述兮。嘯傲花間。得句札兮。以此優游。遣孤子兮。叔有三良。姪無一兮。老填溝壑。誰其恤兮。會記別叔。道忠告兮。屢接誠書。如嚴罰兮。姪不出山。叔或必兮。山不可留。叔安警兮。自叔仙遊。過誰叱兮。每一撫膺。冠欲絕兮。今當歸窆。在九月兮。一籬僅隔。豈不悉兮。有覩無扣音。愧芻苢兮。聊歌薤露。代執紼兮。靈其有知。鑒此潔兮。

戶部河南司郎中袁松山公墓表

公諱承紱。號松山。始祖諱彥忠。明洪武初。由直隸棗強遷山左。世爲長山人。九傳至高祖諱治性。曾祖諱雲蒸。子二。長景芳。次景文。景芳舉兄弟五人。長承紱。官廣西柳州府知府。次承祖。官刑部司務。四承績。候

補都察院都事。五承約。原任禮部司務。監督大通橋。三卽公也。公生而穎異。不苟言笑。年二十。補博士弟子員。性喜法書。行楷皆精。人爭求之。雍正元年。公太翁在巴里坤辦軍需。得腿疾告歸。未幾。捐館舍。兄承紡守柳州。兩弟俱幼。公悉引爲己任。自名其居曰怡怡堂。兄乏嗣。母憂之。鈿甫彌月。卽出嗣焉。母疾。日侍湯藥。衣不解帶者累月。服闋。公兄勸公仕。乾隆十三年。遂遵例除授戶部河南司員外郎。乾隆十四年。河南藩司條奏民間買賣田契法事。下本司酌議。公謂貪吏以大報小。奸名爭執。訐訟實緣契尾格式未明。議將藩司頒發契尾。編列號數。後幅空白。預鈐司印。以備銀數填寫。令業戶看明騎字。截開平分爲二。自難改換。庶可於民無累。於稅無虧。遂定爲例。至今遵行。又河南咨水涸田畝。按例升科。將議准行。公獨以水潦無時。雖暫可佃種。或旋爲澤潴。一歸成額。恐復沉湮。重以催科爲累。百姓何堪。遂議將升科田有復被水潦難耕者。仍准督撫查明請豁。以舒民困。執政聽之。其持正皆此類。乾隆十六年。兼上諭館行走。稽查旗務。十七年。陞本司郎中。時五弟以禮部司務兼督通州中倉。適有言通倉虧缺。奉旨派員清查者。大吏惶懼。不知所爲。公獨曰。倉穀陳因百餘年間。尙未聞太倉鼠耗。今任事伊始。安得有虧。不知者借此建議。聖明在上。自必已洞鑒情僞。靜以處之。當水落石出。無憂也。未幾。果盤查無缺。人咸服公鎮定。公素有怔忡疾。十八年。請假歸里。居南有圃。構屋數椽。起小閣。名曰養拙。蓋取老氏知止之義也。閣下有池。結草亭於北。顏曰松蔭。公日與諸昆嘯傲其中。視人間事泊如也。公教子最嚴。長君始入學。卽與鄉薦。旋授內閣中書。在軍機處行走。公書勤幹慎密四字寄之。乙亥。陞內閣侍讀。丁丑。署吏部文選。庚辰春。因京察一

等幸已轉江西道監察御史。是年秋，除兩浙鹽驛道。長君以浙中山水甲天下，屢請迎養。癸未春，公輕騎減從，自里門抵清江，由水路歷淮陽，遊姑蘇。夏初，至浙北新關，遂坐山轎進杭。是時長君方差家丁迎於姑蘇之間，而不知已駕一葉之舟先至署前也。聞門吏報曰：轅門有客，容貌甚偉，辭以本官公出，則云：閩人王姓，識吾，可令來見。不知何許人。家人趨出，則公也。公喜，謂長君曰：吾此來，差可慰者，汝作官之聲名，尚不惡也。西湖風景，吾既至，當領略大槩，勿令人知。隨帶一僮，遍歷諸勝，月餘，不耐酷暑，遂買州北歸。公天性謙冲，與人無忤，非禮之來，絕不與校。獨建義學，無力者悉來受書。若遇歲歉，則出餘粟以濟貧乏。人稱爲四佛。將卒之夕，聚其諸昆諸子，姑姊妹談笑竟夜。忽曰：吾大兒受國恩最重，必大吾族，吾無憂矣。遂卒。噫，異矣。公生于康熙四十七年十一月十四日，子時。歷官戶部河南司郎中，覃恩誥封中憲大夫。以長君守侗貴，誥贈通奉大夫如其官。卒於乾隆三十一年十一月十六日午時。享年五十有九。葬於祖山之陽。男四：長守侗，甲子科舉人，廣西按察使司按察使，娶石氏，以夫貴。王公諱士慎曾孫女。次守仲，甘肅蘭州府河橋同知，娶張氏女。次守侑，出嗣官戶部廣西員外郎，娶孫氏。次守仲，邑庠生，娶趙氏。孫男二：鎬，銓。長君守侗出一錫，次君守仲出二錡，次君守侑出一鎬。出。同人與長君同司，素稔公之嘉言懿行也。其家已請名公卿爲墓銘矣。同人因共爲墓表以寄之。蓋銘以藏墓內，表以立墓外也。文曰：煌煌望族，嶽瀆之光，奕奕登朝，邦家之昌。我聞善者，長發其祥。凡今之人，孰與之亢。

節婦黃氏墓表

節婦黃氏。中江儒士仁鳳之女。余益友之妻也。十六于歸。甫六載。而夫亡。年纔二十一。生一子。人哲。方四齡。痛不欲生。水漿不入口者七日。舅姑憂甚。乃以撫孤養親大義責之。乃進粥。婦素稟幽貞。持家勤儉。內言不出。外言不入。閨門之內。盡範肅然。性尤孝。家雖貧。事雙親。脂膏滌瀉必備。敦木卮匱非餽莫敢用。雖典質不惜。自用則菽粟而已。數十年如一日也。雙親疾病。侍湯藥。衣不解帶半年。及相繼歿。經營窶窶。必親臨。盡善乃已。課子義方。挑燈助績。機聲與書聲。輒夜不休。人有夜行失火者。輒曰。黃氏家有燈云。及長。始令負笈擇師。旋送入成均。舉止有禮法。人稱爲夫子。皆節婦教也。乾隆五十七年十一月初三日。無疾而終。享壽六十五歲。守節四十五年。蓋雖閭里圭竇。實爲女中第一完人。壬子。葬于先人之祖塋。里人公舉節孝。有司以聞。建坊旌表于灣之南山。予忝爲鄉人。先已題其主。例得表其墓。乃爲敘次其始末如此。嗚呼。可謂節婦也已。文曰。石之貞。婦其有栢之堅。婦其守如日月。名不朽。如岡陵。永同壽。

童山文集卷十六

墓誌銘上

誥授文林郎翰林院檢討充國史館纂修鶴林張公墓誌銘

哀哉。吾友其亡矣。計吾友生平。握手論交。指不勝屈。而相視莫逆。唯余一人。乃余以先人大故。奔馳四方。幾足踣目。而吾友又頻年困臥床褥。以至于歿。不獲面訣。痛何如乎。昨已取其生平所爲詩文序之。以授其子鑑矣。今其子又求爲墓誌。余會憶生前。吾友嘗相戲曰。吾若死。必得君爲誌。余竊怪其不祥。然謂達者之言。嗚呼。孰知其竟成讖乎。是非吾爲誌不可也。公諱鷺。字鶴林。先世有官中書者。自晉洪洞遷於秦涇陽之辛官里。鼎革後。伯祖振祚以順治孝廉任江西泰和令。一載卒於官。祖丕祚。廩生。父鳳徽。年幼家貧。遂棄學從商於四川之成都。因家焉。生公三人。長翹。廩生。三竊。庚辰舉人。現任梓潼縣訓導。次卽公也。公幼好讀書。不喜嬉遊。性至孝。兒時從師塾。中有遺以餅餌者。必懷歸以食太孺人。以是識者知其不凡。體素羸。有百藥之目。而手不釋卷。父母每痛抑之。弗顧也。丙辰。家遭回祿。生計愈艱。乙丑。兄翹遊庠。太封翁卽於是年捐館舍。公與兄哀毀骨立。共坐苦廬。而室如懸磬。債若蝟集。兄與公謀。自攜弟竊授館於外。家務俱命公主持。時公年十七。上事太孺人。下撫弱妹。外應門戶。凡井臼之事。靡不躬親。是時。同里胡公政者。家頗裕。公叩門求貸。胡公哀其勤苦。借粟若干。路頗遠。公自負米而歸。胡公目送之。嘆曰。孝子也。

隨遣人議婚。卽今孺人也。而家計益迫。兼年歉米貴。公日則爲人傭書。夜則焚膏誦讀。始於戊辰補博士弟子員。於是與兄俱館於外。而束修所入。不敵所出。乃與兄謀。仍爲商作鹽販。肩挑車運。鬻於雲貴邊境。龍宮虎窟。跌宕數次。懸崖絕壁之間。奔苦者幾年。而所獲卒無幾。公乃慨然曰。利之不成。名又安在大。丈夫終當奮志青雲。焉能齷齪爲此乎。卽先歸。留兄收債於後。遂閉戶卒業。以丙子歲考高等食廩。遂入錦江書院肄業。己卯。中鄉試二十七名。此時雖賀客滿門。而囊無一錢。已自分不入春闈矣。是科座主少尉周立崖先生知之。因挈與偕行。上道。至京。卽館於周宅。明年庚辰。成進士。改庶吉士。蓋自爲商以至成名。盤根錯節。卒紆青紫。登瀛洲。所謂有志事竟成也。辛巳。授檢討。益發憤爲文章。務爲古文。目館閣體爲大帽子。故一時同官者。羣指公律賦試帖爲復古云。甲申歲。掌院薦公堪任府道。引見記名。公益惕勵。丁亥歲。其子鑑與公兄翽奉太孺人。孺人來京就養。戊子五月。補國史館纂修官。喜曰。向恥素餐。無補絲毫。今得藉手矣。時患便血。猶力疾赴館。至八月初六日。屆順天鄉試。上以公充同考官。先是蜀中近十科未有與茲選者。公聞命下喜。欲力疾入闈。而終以病委頓不能行。又保舉御史。亦以病困不能赴。遂至不起。臨卒。賦詩二章以示兄與子。從容放筆而卒。嗚呼。豈蒼蒼者生之而不能成之耶。抑以一科名遂足償其坎珂之遭耶。世之享庸庸福者不乏矣。豈有意獨增于彼而減于此耶。是皆其不可知者也。公爲人耿介有節操。凡赴人之難。如救水火。遇友有過。不惜忠告。人有負者。亦不與較。從未有凶終而隙末者。以故疾病連年。參苓之費皆出師友所助云。所著有鶴林詩草十卷。館課存稿十卷。制藝二卷。古文二卷。俱屬余

編次。公生於雍正己酉年十一月十一日亥時。卒於乾隆己丑年十月初五日酉時。享年四十一。公祖不祚。涇陽廩生。地封文林郎翰林院檢討。祖妣李氏。地封孺人。父鳳徵。誥封文林郎翰林院檢討。母王氏。誥封孺人。配胡氏。諱政公長女。例封孺人。子四。長鑑。次季官。三鈺。四元官。季官下三子俱先公卒。女一。殤。明年將扶襯歸葬於成都之祖墳。余爲之銘曰。

論其閔閔。洪洞涇陽。論其事業。商賈文章。以云不達。名登廟廊。以云官顯。身在匡床。府道御史。如夢一場。史館房考。如電一光。嗚呼。天耶。人耶。吾不得而知其詳。

誥封文林郎翰林院檢討例贈奉直大夫掌福建道監察御史彥菴劉公墓誌銘

劉君諱溢。號彥菴。世居貴州遵義縣八甲紅江。父志聖。生君二人。長濤。庠生。次卽君也。君太翁以遵義地窄人稠。遷居重慶之大足縣。遂家焉。君甫生八歲。太孺人卒。卽喜讀書。試輒冠軍。補博士弟子員。科歲皆前等。學使宋雅伯器之。使入錦江書院肄業。己酉。入選拔。卽丁父憂。以授徒爲業。長君天成。六齡失恃。苦讀書。患咳嗽。人謂童子勞。君憂之。及長。君應童子試。皆例前茅。君曰。向恐不壽。今如此。非凡物也。君孝友。昆仲同居五十餘年。內外無間言。其處鄉黨宗族。周急濟貧。每有向公借貸不能償者。遂焚其券。有鄉人酒後無禮於公。旁觀皆爲不平。君從容謂衆曰。彼已入醉鄉。所言皆酒言也。不必與校。次日。其人愧悔。詣謝。公仍婉慰之。其量如此。君美豐容。長髯飄飄若仙。望之令人生敬。性尤好潔。衣履雖敝。猶無片塵。每日晨起。常親身洒掃。長君諫之。公曰。古人云。掃地心常靜。此豈下學功也。持家勤儉。常手書朱子家訓於座。

右見諸子有不合理者。卽舉家訓以規之。癸亥。長君天成入泮。癸酉。旋入選拔。是歲舉於鄉。甲戌。成進士。入館選。先是邑中百餘無登甲第者。實自長君始。甲申。擢至臺垣。君以書諭曰。朝廷不以汝不肖。以耳目寄汝。家有歷代名臣奏議一書。惜遠道難寄。其價不過數金。汝當節俸以購之。庶立言得大體。不致以瑣屑瀆天聽。君時任慶符廣文五載。辛巳。遇覃恩。以辭職就封。請於上憲。允之。遂致仕還里。自造一室。規模軒敞。日夕焚香讀書其中。丙戌。春闈。長君奉命內監試。與大總裁等朝夕一堂。詢及起居。時方值君誕辰。長君爲述其狀。望山尹相國手書眉壽松姿匾額一道。詩四首。叔度裘大司寇。鳧山陸大宗伯。亦各贈詩章壽聯。方以賚回。而忽焉遐視。可哀也已。君生於康熙壬申年十月十三日子時。卒於乾隆己丑年六月十五日卯時。原娶王孺人。諱玉振君女。續娶譚孺人。庠生命臣君長女。繼娶廖孺人。庠生諱顯榮公次女。俱誥封子四。長天成。癸酉科拔貢。是科舉人。甲戌進士。改庶吉士。授職檢討。旋擢掌福建道監察御史。譚孺人出。宜人譚氏。歲貢生候補選訓導。諱致中君長女。次天位。庠生。娶韓氏。諱易公四女。次天恩。庠生。娶江氏。次天賜。娶楊氏。俱廖孺人出。將以明年某月某日卜葬于祖墳之西。爲之銘曰。有關必先觀其德兮。流芳何自始。香國兮。毓生麒麟。邦司直兮。豺狼避道。愬彈劾兮。惟公義方。負荷克兮。吾鄉之人。永是則兮。

誥授中憲大夫永定河道韞山陳公墓誌銘

永定河卽桑乾河。古濕水也。以其水濁。故曰渾河。以其色黑。故曰盧溝河。又遷徙不常。故曰無定河。源出

太原天池。伏流至朔州馬邑。從雷山發爲渾泉。合雲中諸水。經太行山東下。會盧溝河。入宛平縣界。流注固安縣。至燕丹口。分而爲二。其一至通州入白河。其一經小直沽入運河。俱入海。河自南山以來。水勢湍激。亦資灌溉。固禾嘗肆。自出石景山東地。平土疏至固安而下。則大肆奔駛。分合靡常。屢爲民患。自金元明以來。時修時決。至我朝順治八年辛卯。河遂遷徙固安迤西。幾七十里。嗣是歲有衝決。康熙三十七年。命撫臣于成龍築堤疏濬。自盧溝挖新河。由固安北十里至永清朱家庄。延袤二百餘里。廣十五丈。始賜名永定。並設南北岸分司各一員。後復命北岸兼理。雍正四年。始陞爲永定河道。總理渾河。駐固安縣。以專責成。河員十八名。雖隸于直督。而權獨歸道。得人自安。不得人則危。任至重也。歷任河道。亦皆治績卓著。而求其不負任使。首膺寵眷者。爲吾蜀陳公一人。公諱琮。字華國。號韞山。高祖起祥。始卜居南部。遭獻賊之亂。以父迎賓病。不能行。負匿山洞。得免于難。遂失譜序。起祥生惠疇。惠疇生策三。俱邑庠生。策三生子四。長璜。三璧。四璿。璧璿俱早卒。次卽公也。公生而右手駢指。爲人沉毅慷慨。多智略。好讀書。尤熟習諸史。其爲文淵深雄偉。甫弱冠卽遊泮。中丙子副車。先予肄業錦江書院。交最深。余後與己卯鄉薦入都。公亦赴國子監肄業。余適官崇志堂學錄。相與劇切琢磨。以圖科舉。公忽謂余曰。吾父母春秋高。急須祿仕。大丈夫要當赤手博功名。安能從文字間討生活乎。遂就職州判。乾隆二十八年。適直隸河工。請員赴部。應挑發永定河委用。補永清縣丞。遇事敢爲。於河工尤留心。胼手胝足。不辭勞瘁。每有建白。輒中肯綮。同官皆異之。三十四年。陞固安縣知縣。茂著循聲。洊任三載。兩遭河決。民田被災。俱親身履勘。代請賑濟。凡

支放錢米。必令葺屋。均沾實惠。奸胥蠹役。失其侵漁。上憲以爲能。三十七年。陞南岸同知。承修玉皇廟。欽工。次年。皇上巡幸天津。便道閱視永定河堤。時戶部尙書新建裘公曰。修久任總河。深器之。謂公曰。君當以河員顯。吾有替人矣。後金門閘接駕。裘公密表公能。奏對稱旨。即于天津行在召見。諭令總理永定河工程。蓋異數也。四十年。丁祖憂。即奔喪回籍。上諭總督周元理曰。河工不比軍功。此人斷不可少。准回家治喪百日。即赴直聽用。公九月抵里。葬事畢。即于四十一年春來直。次年。服闋。仍補南岸同知。時承修戒壇寺。欽工方竣。次年十二月。復丁祖母喪。而元配何恭人復卒。四十六年。服闋。仍赴直候補。恭逢皇上巡幸熱河。委查密雲一帶道路。因得隨班恭迎聖駕。上諭軍機大臣曰。永定河同知陳琮。熟習河工。今安在。令查取職名。蓋昔年新建公業經密薦。已蒙天子記名屏風。而公不知也。大吏聞之。即于四十七年。委署東安縣事。十二月。即題補務關同知。務關。通水道屬也。先是公爲固安令。余方赴京候補主事。負債二百不能償。赴固求飲。適一瞽者趙鐵鬚。能布算知星。公密令互換八字以示之。趙以手撥算盤而笑曰。此二命。一京官六品。一外官七品。然外官終爲京官屬員。人俱不信。公笑曰。若是。則愈可借也。遂若數交余而去。至是。予由廣東學政復命。授通水道。謁予道署。相見歡甚。謂公曰。趙鐵鬚之言驗矣。四十九年春。聖駕南巡於新城。召見問河工事宜。俱稱旨。是日賜宴。賞貢緞二疋。荷包一對。貂皮一對。回鑾。復于趙北口召見。問堤工水勢。奏對如前。五十年。上自熱河回鑾。於亭子召見。詳問河工。公面請加培堤。奉旨估辦。五十二年。巡幸五臺。於半壁店召見。回鑾時。又於新城召見。問河工平安否。公奏對俱如聖裁。是年秋。上自熱

河回鑾。復于南石槽召見。問水勢大小工程等項。及新修堤工有益與否。公一一奏對稱旨。天顏大悅。五
十三年二月。巡幸天津。於趙北口召見。問凌汎水勢。奏如前。於左各庄賜宴。又于王家廠召見。面奏永定
河下口情形。並呈永定河全圖。蒙恩賞黃緞一疋。袍料二件。貂皮一對。聖駕至桐栢村。由軍機處傳旨。取
永定河簡明圖。五月上。赴熱河。於密雲召見。問下口情形及永定河平安。公爲陳奏。如聖意。公在永定既
久。以永定河源流分合。險夷遷徙。即在河年久者。亦難深晰。若驟易生手。必茫然失錯。乃沿岸履勘。準今
酌古。多方採集。彙爲永定河志。俾後之觀斯土者。瞭如指掌。殫心考究。三年乃成。總督劉公峨見之。嘆曰。
渾河工程莫備于是矣。五十四年三月初十日。聖駕駐蹕湯山。奏陳所輯永定河志已告成。上曰。他去年
所進圖就好。着軍機大臣閱看。卽日召見獎慰。十八日。軍機處奏覆。陳琮所輯永定河志。分門別類。體例
尙屬整齊。恭錄歷年皇上親臨指示諭旨。亦皆詳備。奉旨。着交懋勤殿藏貯。方謀刊志。得疾旋歸。至五月
初八日卒。其卒時猶諄諄以君恩未報爲言。大吏以聞。上嗟悼久之。連稱可惜。可惜。諭軍機大臣曰。陳琮
自任永定河以來。今經五年。渾河安瀾無恙。皆琮之力。不料其遽溘逝也。先是蜀人在外任。無爲大僚者。
惟予與公俱少同窗。仕同省。又俱爲觀察。邀聖恩寵眷。乃予任通永不克稱職。深負聖恩。所屬望補報者。
惟公一人。而前任永定河道蘭第錫陞山東總河。以公代之。人皆謂公受上知。有過于蘭。指日總河可冀。
孰知竟止于此。豈非蜀之不幸乎。初。太翁生公時。夢一老翁。自言固安人。寤而生公。公由縣丞至道皆固
安。斯亦奇矣。人疑前身應此地土神云。公善相度形勢。永定道署舊在固安城中。緣地勢低窪。前憲奏改

城外。公適爲固安令。相度修建。輪奐一新。及累陞。是職後。見四面軒敞。初無關扃。乃鳩工集事于東西二面。挑成水渠。中設一橋。以通往來。外爲築堤垠。署後地逼民產。有願鬻者。卽爲覲之。於四圍廣植楊柳。春夏之交。暢茂蔭翳。堤旣堅固。景亦宜人。迄今稱善。公素疎財好義。固安近京百里。凡在都門京官。以及守銓。空乏來告者。無不傾囊以贈。毋稍吝色。於親戚尤加厚焉。更喜急人之難。予被議發伊犁。當差公以百金走。後余贖還。有部核河工銀二千兩。槩然代余完納。余有所刻函海叢書。共二百六十種。以負梓人三百刻資。扣板不發。亦公代爲贖回。及公卒之日。所借貸者。無論有券無券。皆攜金至靈前。還其子官林。慟哭而去。其樂善感人如此。而尤與予莫逆。乾隆辛巳。余由通歸里。道出固安。公方受上眷。赫奕甚。乃不鄙棄。欣然出子女各一。指示予曰。君亦當出子女各一。互爲朱陳。余笑而從之。及公卒後。予家居十餘年。公子官林。余子朝龍。皆畢婚嫁。情公不得見云。公生于雍正九年七月初四日巳時。卒于乾隆五十四年五月初八日申時。享年五十有九。誥授中憲大夫。直隸永定河道。配何氏。誥封恭人。邑庠生世文。公次女。先卒。祖惠疇。祖妣何氏。父策三。母趙氏。俱以公貴。贈如其官。子六。長中林。先卒。娶杜氏。鹽亭太學生英公長女。守節不嫁。次三四五俱早卒。六官林。劉孺人出。卽吾第六女壻也。女二。長字原任隣水縣教諭元煒。猶公長子。二字吾次子朝龍。有詩文集二卷。藏於家。銘曰。

舜咨四岳。禹作司空。熙帝之載。惟克奮庸。太行以南。桑乾以東。誰其繼哉。韞山之功。賈讓留疏。平當盡職。誰其邁哉。韞山之德。閩山峨峨。閩水湯湯。佳城永固。世澤綿長。

誥封朝議大夫貴州南籠府知府唐公堯春墓誌銘

余乙巳回里。閱三年。在什邡道中。見有擁娶車丹旆而過者。問之。乃南籠太守之柩。慟曰。此吾友堯春也。遂至此乎。是夜爲位旅次。作輓詩二章哭之。有車過腹應痛。灰然身已頽之句。旣而欲臨其棺。知其窆期尙有待也。今年八月。余至省。觀姪輩入闈。長君張友以書來曰。先君柩不入土。今已五年。頃始卜地於武都山。擇於九月十八日安厝。竊念先君至友。惟父執一人。而先君事迹。又惟父執知之甚悉。歐陽公云。先世碑銘。必得蓄道德而能文章者爲之。始克傳世而行遠。父執金石鴻文。海內奉爲至寶。倘不仰邀鉅筆。盡克壽世。況吾先子之素志也。伏乞賜撰墓誌。以光泉壤。死且不朽。余聞之。愴然曰。堯春與余少同試於有司。又嘗從先北路公遊。且君長女曾與殤兒結姻。蓋親莫親於吾二人也。余雖不敏。又安敢辭。公諱樂宇。字堯春。號九峰。先世居楚麻城。五世祖伯顧。始遷蜀之遂寧。中順治甲午舉人。累官至陝西洮岷道。祖載思公。中康熙壬午舉人。累官戶部廣東清吏司員外郎。先官綿竹訓導。遂家焉。父汪波公。由貢生官安徽桐城縣知縣。生子九人。九卽公也。公生有夙慧。穎異過人。讀書過目成誦。下筆千言立就。少長盡通四書經史。旁參諸子百家。下至天文地理之學。無不窮究。壬午。蜀闈典試。正考爲懷寧丁芷谿先生。得卷卽定元矣。後得他卷。復易爲第六。揭曉。深以爲憾。丙戌。三甲成進士。授主事。是科。吾蜀井研雷雷峰。銅梁王鎮之。皆二甲。雷已館選。王授部曹。而公以三甲得主事。奇遇也。籤授戶部。公素明九章算法。凡錢糧權稅。步指便知。摺奏檔案。過眼卽能檢出。胥吏不得爲姦。以是各司農皆倚爲左右手。金川之役。辦理軍需。奏

銷事。纖毫不爽。今大學士和相國尤器之。陞員外郎。保舉提督錢法堂監督。並保陞員外論俸。推陞禮部郎中。和公仍奏回本部山西司郎中。兼充內庭方略館纂修。兼戶部則例館纂修。其見重如此。由郎中推滿。選授貴州平越府知府。其地亢旱。幾半年。公到任。跣足至壇祈禱。得雨。人稱神君。又見山水秀美。謂此中必多佳士。及觀風而能文者。寥寥。究其故。則僻處邊隅。久無師承。而肄業亦無專所。公乃捐俸修墨香書院。延浙江名孝廉葉夢麟爲掌教。厚其修脯。設膏火。擇其尤者十餘人。親爲授受。丙午科。書院中式者。遂有蘇廷和、甘思贊等數人。蓋平越不開科者已三十餘年矣。上臺聞公賢能。復調任南籠府。南籠幅員遼闊。苗民雜處。刁健善訟。積案如山。有康熙初年拖延未結者。公蒞任月餘。日則坐大堂決事。夜則燃燭閱案。輒漏下四刻乃止。案牘爲之一清。以至積勞成疾。得嘔血症。調養稍愈。旋因公被議。鐫級解任。入京捐復。蒙恩仍以知府用。隨丁母程太恭人艱。時家口俱寓湖南。以中丞浦蒼霖舊農部同事也。故依之。復力疾至長沙。扶榭歸里。至夔州。舊症復發。卒于雲陽舟次。享年五十有三。公爲人短視。有目可瞻焉。之諄然胸羅萬卷。兼精六壬五星。並著有奇門紀要。常于琉璃廠市得西洋渾天銅儀。購歸。排列敷衍。遂通勾股之法。守南籠時。見太白行度非常。私謂總鎮某曰。君宜秣馬勵兵。不久當有警報矣。是年果有臺灣之役。羣謂斯言有驗。公曰。未也。當在蜀徼外。不三年。西藏復告變。其神驗如此。居官多異政。當爲錢法堂監督時。鑄工萬餘。忽以私憤致變。公卽促駕撫之。羣戒勿往。公曰。若輩無知。豈可聽其釀巨禍耶。毅然入其羣。曉以大義。皆流涕服罪而去。又鍾神有祟。每夜輒翮爐頭。公問其狀。則神前土偶皂役也。以釘釘其

足血出而崇息。爲人瀟灑絕俗。性嗜酒。非酒不食。不問家人生產。好購書。官監督時。所入俸以萬計。盡以易書。疊架盈櫥。雖朝炊不繼。宴如也。善譚諧。赴平越時。空乏不能具行李。保定守爲同年王汝璧。素相善。以缺費拜謁。王知其意。辭以病。公直下輿。坐大堂。暖閣候久之。竟不得見。乃醮案上硃題詩於壁曰。右諭通知貼大堂。主人從不會同鄉。門前若遇抽豐客。祇說官今病在床。投筆竟去。其善謔如此。少以詩名。有桔柏渡句云。白沙十里月。黃葉半江湖。人呼爲唐黃葉。沒後詩多散軼。張雲谷其四子岳翁也。爲之哀集。復得三十餘篇。有送雲谷還固始一首。已載余雨村詩話中。其他作多類是。當屬其長君刻以傳世。噫。公之與余。無日不詩同吟。酒同斟。而余科第官階。每占公先一着。然生平事無不歷。歷可數。及爲誌。而年老善忘。記憶僅此。亦可慨矣。然人生在世。可傳者。原不在多也。君嘗謂余曰。我年少於君。必沒在君後。善事我。當爲君作佳誌。雖一時戲言。嗟乎。庸詎知六十餘歲人。反爲五十餘歲人作誌哉。公生於乾隆己未四月初八日寅時。卒於乾隆辛亥三月十一日未時。娶梅氏。先公卒。繼娶戴氏。中江己卯孝廉。霸州知州。諱治女。生一子。張扶。再娶朱氏。生子六。張友。庠生。張瑤。張恩。張祿。張岩。張超。俱業儒。女四。孫二。僊桂。蔭桂。以乙卯年葬於武都山之陽。爲之銘曰。

紫巖巍巍。有異人兮。佩玉鳴珂。侍楓宸兮。談天雕龍。罔不聞兮。政在黔江。跡未陳兮。猿啼三峽。鶴風雲兮。未竟厥志。貽後昆兮。鬱鬱松岡。安神魂兮。

童山文集卷十七

墓誌銘下

勅授文林郎晉封奉直大夫山東泰安縣知縣何瑞菴墓誌銘

何瑞菴。余姻家也。今年二月初四日。余增耀茹以書來請曰。先君瑞菴公。以正月初四日卒。今將歸窆。念先君嘉言懿行。例得銘壙。而相知無如吾岳者。請銓次爲誌。存沒均感。余聞之。自慙不文。旣而思瑞菴與予。少同戲於竹馬。長又結爲鷦羅。生平行事。固未有詳悉如予者。非余其孰能銘。瑞菴。諱人麟。字玉書。其先江南無錫人也。九世祖清明。萬歷間爲綿州指揮。封武略將軍。子孫遂家焉。清生憲圖。憲圖生繼武。繼武生永靖。俱襲前職。永靖生天章。庠生成章。醫官。值獻賊亂。匿山洞。僅以身免。天章生坤。庠生。是爲瑞菴之祖。以孫貴。貤贈奉直大夫。祖妣王氏。贈宜人。坤生子二。漣。涵。漣。庠生。官至雲南雲龍州吏目。陞祿豐縣丞兼縣事。涵。由庠生入太學。卽瑞菴父也。以子貴。封修職郎。妣嚴氏。封宜人。瑞菴生而慷慨。有智略。不屑屑生產。讀書略通大意。善作文。工楷書。兼草篆。然志不在科舉。少與余同憲。每對黃卷青燈。輒嘆曰。大丈夫要當于盤根錯節中見利器耳。吾非蠹書蟲。安能生死文字間哉。後于丙子己卯兩科不售。遂決意進取。援例授劍州訓導。時金川用兵。奉檄辦武連站。支應滿漢官兵軍火餉糈。供應兩載。絲毫無缺。大吏以爲能。遂令代辦劍州事。時乾隆三十六年也。三十八年十月十六日。總督文公綬奏。調赴南路明將軍大

營辦寫奏摺。登記冊檔。君卽馳驛出口。至僧格宗大營。三十九年。隨明將軍進攻馬奈。當是時。長蛇未殲。列陣相持。虎帳龍韜。雷轟電掣。羽書奔馳。席不暇煖。而君才本敏捷。膽力過人。日草萬言。倚馬可待。雖兩兵交接之際。幾中鎗傷。而君了無懼色。遂佐成功。將軍深器之。不離左右。復因後路軍糧急迫。檄往瀘城。章谷。噶達城等站。催趲夫糧。俱咄嗟而辦。益以爲能。方將大用。而父訃適聞。君大慟。卽報明奔喪。總督文公謂將軍曰。此人軍營斷不可少。何可令其去乎。卽奏明仍留軍營守制。四十年四月。調陞冕寧縣教諭。未之任。卽委赴兩路軍營清查站卡。時值進攻科曲步山。梁總督富公以君明白幹練。奏明留軍營辦站。隨由墨魯古改委勒烏圍。隨浙藩郝公碩。臬司白公瀛。赴噶拉衣前。抵八卦碇。支應各山梁營卡。軍糧。軍火。三月初八。又委隨白公催運後路各站存貯勒烏圍。噶拉衣軍糧。隨閱丈促浸攢拉地畝。大兵凱旋。始隨白公回省。蓋自三十六年軍興以來。至四十一年始終。軍營六載有餘。辦理檔案各務。未嘗遺誤者。君一人而已。金川旣平。又委辦軍需局奏銷。君以父未葬。請假治喪事。甫畢。卽催赴局。十月初六。總督以君久歷塞外。奮勇出力。卽專奏請以知縣卽用。奉旨俞允。並錄平定金川案軍功一等加一級隨帶。又辦理兵差案。復議軍功加一級隨帶。四十三年二月。山東請員。奉上諭發往。歷署惠民。定陶。平原等縣。遇事敢爲。每有建白。輒爲大吏器重。是年承辦德州皇差。于上駟院更換馬疋不誤。補授蓬萊縣知縣。四十八年。調繁泰安縣。次年恭逢皇上海巡。辦理泰山岳廟欽工。並白鶴泉及魏家菴兩行宮。俱不悞。次年二月初六。于新庄道旁迎駕。上命軍機處記名。並恩賞貢緞二疋。荷包一對。並加一級。五十年。山東巡撫以君奏

最第一。卓異候陞。當是時。皆以君久膺上眷。大用可操券矣。乃旋以承審東平案婦袁劉氏。驀京赴控。伊兄圖產逼嫁一案。部議以承審遲延。鑄二級調用。衆論惜之。其罷職也。兩袖清風。而官項纍纍。得歷城義士孟文獻資助萬金。乃得解去。先是母嚴宜人年老多疾。亟思歸養。後以君恩未報。冀捐復以圖晚效。于五十二年。領咨入都。而母訃忽至。五十四年八月。自京匍匐歸里。棺猶在室。一慟幾絕。方謀葬親之事。忽于五十六年正月初四日無病而終。惜哉。未卒之前一年臘月初五。爲予生辰。曾有書寄予曰。自泰安一別。飢渴至今。本欲過君。劇談闊跡。然林下之日甚長。不在亟晤。再二年爲君六十壽。當登堂酌以大斗也。蓋余罷官。曾至山左相訪。故云爾。孰知泰安一別。遂爲永訣哉。君性至孝。官蓬萊時。迎母侍養。暇則奉板輿登蓬萊觀海市。及宰泰安。又奉母登泰山。遍覽名勝。以娛母心。南巡時。又引母迎駕。以覲天顏。皆人所難得。尤友愛諸弟。次弟人鶴緣事繫獄。遣人入都爲辦贖。罪得減等不死。雖獄中負債邱山。一身肩之。尤爲人所難云。君生于雍正十年壬子五月二十七日酉時。卒于乾隆五十六年辛亥正月初四日酉時。享壽六十。官至泰安縣知縣。勅授文林郎。晉授奉直大夫。元配江氏。例贈宜人。安徽人。原任雲南抱母井鹽課司吏目。先卒。繼娶劉孺人。例封宜人。男五。長耀茹。廩貢生。候選訓導。娶李氏。卽余長女也。二豁茹。捐從九品職銜。娶馬氏。原任甘肅鎮番縣知縣。諱志修。公么女。三晉茹。增生。娶張氏。昭化廩貢生。候選儒學。諱憲齡。公長女。四申茹。過繼弟人鶴爲後。五釋茹。娶吳氏女。一字雙流。武進士。任江西袁州衛守備。諱德勝。三胞弟。先卒。孫二。長裕宗。豁茹出。二光宗。耀茹出。均未聘。孫女七。三五耀茹出。四六豁茹出。長二。早卒。於

某年某月葬於祖塋之陽。銘曰。

謂無命耶。胡爲乎不由乎科而能自展其才。謂有命耶。胡爲乎既遇其時而又不終其用。鋒刃之下而文字任其馳驅。平康之間而顛躓轉失其縱送。此豈冥冥者莫之爲而爲乎。抑亦紛紛者皆爲造物之所弄。嗟嗟。君其含笑而遊九原乎。功在竹帛。名在天壤矣。以視夫碌碌庸庸而享彭鏗之壽。陶朱之富者。其又孰輕而孰重。

朱雲飛墓誌銘

朱公諱鵬。字雲飛。原籍陝西同州府大荔縣楊村人。乾隆元年。移居綿竹之西關。遂爲四川人。生于康熙丁酉年九月二十八日亥時。卒于乾隆乙卯年十一月廿一日亥時。享年八十。今於嘉慶元年丙辰十一月廿六申時。卜葬於已所分西義鄉猴子林。其子永祿。恐歷久而忘其始末。因屬余爲誌。夫墓之有誌。所以揚名顯親也。先人無其實而誌之。是誣之也。有其實而不誌。是蔑之也。誣之尙不可。況蔑之乎。公爲人豐頤修髯。舉止端方。居心寬厚。待人誠信。少年家計艱窘。乃由秦入蜀。爲什一之計。備歷辛苦。數十年來。乃克成業。教子以詩書。傳家以孝弟。皆公之訓也。公善釀。有杜康之風。以此起家。至今稱善釀。莫不以西關朱家爲第一。余固不文。然忝在姻誼。又其孫絨從余學。故知之甚悉。爲述其略。庶無誣蔑之憾焉。公娶張氏。生子二。長永祿。次永壽。孫五。絨、繡、紘、永祿出。綱、紀、永壽出。銘曰。

巍巍岡陵。鬱鬱松柏。萬古藏形。百世流澤。

處士郭世藩墓誌銘

公名繼先，字世藩，年六十有七，卒于庚寅之歲。安厝於後山之陽。所生四男、五女。季男歲進士幹，生大有，掇武科，大升，入爨序，幹出，余先大夫門下。丙午，余遊太白之青蓮鄉，曾登其堂，見嘉樹森列，鬱鬱有佳氣。隨謁先塋，左抱匡山，右浥涪水，叢篠杉藤，皆雲蒸霞蔚，益信其發脈所自來，爲之留詩而去。今年春正晦日，郭子踵門而告余曰：先君之塋，子所知也，舊有石爲風雨所剝蝕，字跡模糊，乞爲銘以重鑄可乎？予惟明德之後，必有達人，積善之家，必有餘慶，所謂善言天者，驗於人也。顧天之理微而難知，而見于人則顯而易察。今郭公之後，而熾而昌，若此，豈非天之報施善人不爽乎？因爲之銘曰：

龍蟠者山耶，虎臥者石耶，森森者蘭耶，桂耶，鬱鬱者松耶，柏耶，嗚呼！盛哉！此天所以報公之德耶。

張孺人程氏墓誌銘

孺人程氏，廣漢川經佩之女，張冠玉公之子庠生凌霄妻也。生于康熙五十年辛卯三月初七日酉時，卒于乾隆四十六年辛丑六月二十八日酉時。自二十一歲守節，以至卒，享壽七十有一。旣建坊以旌，例得埋石爲誌。初凌霄公之歿也，誓以身殉，明經責以撫孤大義，始起視事。所生二男、一女，一仁壽，一邦伸，皆幼，姑早亡，其舅已老，一室蕭然，惻獨無依。孺人哭其夫，三年不御酒肉，未嘗一日去舅側。而伯舅姑沒，所遺三男，邦璧、邦璨、邦瑄，皆撫如己子，令與仁壽同寢處。迄長成，始析令成家。邦璧等亦終身事之如生母焉。甲子春，舅冠玉公歿，盡哀盡誠，讀禮畢，始專以教子爲事。日則送塾從師，夜則篝燈自課，稍怠則鞭笞。

隨之一日。邦仲偶倦。孺人手提其耳責曰。汝父彌留時。目汝兄弟。囑曰。我生平未竟之志。將于二子是竟。汝善教之。務成我志。毋使我目不瞑也。吾刻不能忘。今昏惰若此。吾無以見汝父于地下矣。且責且泣。邦仲等自是發憤。不敢坐荒。每聞聲息。如同嚴父。卒成令名。癸酉甲戌。二子相繼登上庠。同赴成都石室肄業。見聞益廣。己卯。邦仲登賢書。兩赴禮闈。不第。丙戌。會春闈。大挑。邦仲意欲得一官以養母。遂選一等。分發河南。以知縣用。明年攝輝縣篆。又明年借補光州判。題授襄城令。迎孺人至署。每見鞠獄。必細詢之。使得其平。嘗曰。吾婦人不知法律。但臨事時。只要心上過得去。便可不愧。不忤聞者皆奉其言爲居官之法。以故邦仲屢膺卓異。調繁爲循良第一焉。乾隆三十八年。仁壽亦援例授布政司經歷。揀發廣西。順道省。母子蓼。孺人見之喜。卽促之行曰。二子皆得官。吾可見汝父矣。及抵粵。署柳州。辦鄉試場務。以勞瘁沒于桂林。孺人聞之大慟。日夜思歸。乃與柩同歸蜀。不半年復思次子在固始。而子亦思母。仍迎來署。庚子署蘭陽時。孺人獲中風疾。卽呈請終養。俟疾稍痊卽行。而孺人遽卒。卽卒之明年。扶柩歸里。卜葬于某之高原。將爲誌以藏諸壙。求銘于子。子雖未得謁見孺人。而綿與漢居相近。其節孝嘗得之宗族無間之言。聞孺人幼通內則。不妄言笑。經營家事。動中禮則。鄉黨有疑難就咨。一經處決。無不得當。人皆稱爲女宗。居家以儉爲本。一生未嘗着紈綺。其二子居官有廉聲。皆出母訓。嗚呼。可謂賢也已。旣葬之後。鄉人呈請奉主入節孝祠。廣漢刺史徐公德元。循良吏也。親服朝服。鼓吹以送。人皆以爲榮。銘曰。

吁嗟孺人兮。女史之標。專屋而罄居兮。菽水簞瓢。泣呱呱以盈前兮。收衆稚之垂髫。閱凱風之劬勞兮。膺

王言之寵褒。從夫子于故邱兮。惟德音之孔昭。

禮汀禪師生壙塔銘

生壙之說。始于唐姚勗之徒。自名壽藏。釋氏則無有也。今年夏五月。禮公高徒悟迷。踵門而告曰。今年七月初三。爲大和尚誕辰。衆徒等欲修壙。以誌始末。請爲塔銘。以垂永久。余懼弗克任。力辭。旣而悟迷再三。請益力。乃就所見所聞于其法嗣者。略記于左。公諱達徹。號禮汀。江南丹徒潘氏子。自少多病。父母寄投小九華山海師。丈下爲弟子。每歲隨父母朝十廟香。見叢林巨剎。山水清幽。輒留連不肯去。蓋其俗根已不凡矣。旣乃以此情呈父母。父母不許。由是復馳逐于商賈場中。風塵僕僕者數年。丁亥歲。父母相繼而逝。己丑。泝舟入蜀。謁峨眉。轉嘉陽。登凌雲。逾東山。憑臨邱壑。遠眺岷源。由此頓忘身世。辛卯夏。遂就東山禮淨碧師。雉髮。接理凌雲。丁酉。乃詣新都寶光。月容和尚受戒律。常自歎云。在俗不明。乃投佛道。佛道不明。兩生煩惱。惟此決定。要討分曉。然當其時。堂職事應酬不能專一。乃假裝回凌雲。獨棲靜室。如是三載。足不履閭。至壬寅秋。頗覺心胸開拓。却于古人公案。參不透澈。自思非影不清。由鏡不明。復念云。假使熱鐵頂上旋。終不得此菩提心。明知悉是幻鏡。却做主宰不得。大抵是擺脫不開。若究明此事。必須懸崖撒手。大死一回方可。遂於佛前洗心懺悔。痛哭嚙啣。將衣物散衆。筆墨盡焚。乃率徒孫至集鳳峯。坪示衆。余坐脫之後。便埋于此。是晚入坐。抖搜精神。發起勇猛。焚香一支。立定誓願。放身捨命拚死。恍如死去。當此之時。一切心識都沒有了。只者知沒有的亦沒有了。不過寸餘香。忽窗外瓦落。一響復蘇。漸覺燈光燦

燦。一切房屋物件猶如新生一般。自覺是個好消息。靜坐片時。通身輕快。卽和身權睡。黎明徐步出外。閱歷山河。種種清幽。而自身病魔亦消。於是檢閱素疑公案。如推門入臼。無用思擬。譬如得本便知其末。遂援筆說偈十餘首。以示大衆。時屆中元。假裝晉省。謁師於什邡羅漢寺。師云。因何事來此。余云。違師數年。尙有未了事來問。師云。何不有事令無事。無事令有事。余云。者回不是者。個事。然卻不敢格外生事。其師凝睇久之。忽欣然笑曰。看徒氣靜神恬。怪道人言在凌雲認眞參究。今日一見。信不虛也。我年邁矣。留爾在此。越三日。任明府降寺。對寶光善度和尙。遂印可禮汀爲法嗣。由此經理常任。于乙巳秋開堂。主席十有三年矣。今年欲爲暫退。衆請再留。因其年老。共爲修塔。以垂將來。乞余爲序。夫禮汀之與余交也。歷有年矣。其自凌雲而主是席也。當是時。寺雖有羅漢之名。而無其實。禮汀念馬祖道場荒蕪日久。乃竭力募化。建東西兩廊。共十二間。先刊明吳興學博必山居士所著宋乾明院羅漢圖。延成都塑工曹志偉。肖五百阿羅漢像于兩廊。又得邑令會稽寧湘維明府一力襄贊。于甲寅冬歲事。復鑿羅漢池。淘馬祖井。添立亭臺。補栽松竹。于是遂爲什邡名刹。而禮公之志亦遂矣。竊常以儒家而論。自周秦西漢以上。無言佛者。至北魏世祖詔及唐傅奕宋宋祁始以爲釋氏本於老莊。然自白馬馱經以來。貝葉流傳。於今具在。皆本橫行梵字。譯爲震旦之文。非剽竊老莊以成篇也。顧常詳讀內典。參求宗旨。與老氏則秦越與莊列實伯仲。莊子曰。莫大於秋毫之末。而太山爲小。莫壽于殤子。而彭祖爲天。此卽芥子須彌。閻浮衆葉之義也。列子曰。視生如死。視富如貧。視人如豕。視吾如人。此卽吾手何如佛手。吾腳何如驢腳之義也。伏聞佛家有

觀白骨法。謂淨坐澄慮。存想自身。血肉腐壞。惟存白骨。與吾相離。自一尺以至尋丈。要見形神元不相屬。則自然超脫矣。此卽舍命拚死之義也。知此則無爲首。生爲脊。死爲尻。充之以至鷄彈輜馬鼠肝蟲臂。積漸假借。化此身爲異物。則形與神離。超然無所往而不可矣。禮公之言。亦卽佛家觀白骨之法也。顧此理向無人道。而禮公獨于此參透宗旨。豈非馬祖之後。又出一馬祖乎。至于工吟咏。善書畫。鈔凌雲之詩。刊菜根之譚。則又其餘事也。諸徒將以今年某月某日爲之築生塔。蓋卽生壙之義也。乃爲之銘曰。惟我禮公。江南名族。少愛山林。長戀名利。乃泝岷峨。矢志薤髮。九項拚身。什邡住足。何以得道。實由慧業。何以精進。實由踐實。五誠爲教。八識刊落。視彼恩愛。革囊盛血。視諸苦海。雪山吹藥。五百羅漢。第一功德。飄然舍去。歸入淨域。淨域者何。復歸寂寞。人生此身。四大和合。髮毛爪齒。皮肉筋骨。皆歸于地。六根所作。唾涕膿血。津液涎沫。皆歸于水。四緣假合。卽知此身。畢竟無着。安時處順。非幻非滅。知此理者。當與莫逆。惟我禮公。全始全末。

童山文集卷十八

行述

誥封奉政大夫同知順天府北路事石亭府君行述

嗚呼。府君其竟逝耶。其竟棄不孝等而長逝耶。憶府君於臘之二十四日。因委估盤山廟工過京。謂不孝調元曰。吾近來因署密雲大差。又兼諸事叢雜。心力俱竭。夜臥不安。汝其檢點樂書中。治怔忡驚悸者。開一二方。並買同仁堂天王補心丹八兩隨帶。不孝調元敬遵令抄錄購辦。府君方欲動身。不孝調元仰謂府君曰。既如此心虛。何不告病調理。府君曰。這回上省。必請暫解調攝。既而盥面畢。攬鏡自詆曰。顏何太赤耶。不孝調元旁言。此皆心火之故。雖不宜參。然先服清心藥。後宜參調補。不孝調元以府君行裝已駕。卽步行至市換參。歸則府君已騎馬先行。留長隨一人在後取參。嗚呼。孰知此卽永訣之時耶。府君自服官以來。從未得一日閒暇。亦從未得享一日鮮衣美食。頓遭慘變。罹此大凶。一回思之。痛入五內。恨不先驅螻蟻於地下。復何敢偷生人世。俯仰哀號。顧念府君平生偉行軼事。實能追步前賢。而服官政績可入循良傳者甚夥。粗記梗概。祇恐遺漏。不敢失誣。伏望仁人大君子俯賜採擇焉。府君姓李氏。諱化楠。通家生王填文治。字廷節。號石亭。世居四川羅江縣之南村壩李家灣。先王父英華公生府君三人。次諱化梗。國學生。又次諱化樟。庠生。長卽府君也。先是先王父娶先王母趙氏。七年無子。康熙五十二年癸巳。往成都石經

寺求子歸。先王母卽有娠。閏六月十四日。先王父以前廳夢一道人送一穿靴頂帽相公來。甫入門。卽報府君生。生卽穎異。喜讀書。尤好經義。家貧兼耕。嘗攜一經就隴畔讀之。故未弱冠卽補博士弟子員。時邑侯爲上元王坦齋先生嘉會見而器重之。延入衙齋。以己子現任四川樂山令諱鉞者使就教。而已授府君以文藝。自是所學日益進。科歲考無不超等。所作制義才脫稿已傳頌人口。二十九歲入選拔。中辛酉舉人。聯捷壬戌進士。人皆以府君爲破天荒。蓋羅江前此無登黃榜者。旋考入咸安宮教習。不就而歸。遠近從學者常百人。執經問難。殆無虛日。辛未將北上謁選。不孝調元送于綿之江干。府君謂不孝曰。從來執綯習氣。大半皆望捐納。不肯讀書。汝如不秀才。不必來任所。吾斷不汝捐也。謹拜受命。以是悉心舉子業。未幾卽入泮。是年六月。府君檢發浙江委用。遇壬申萬壽恩科。爲同考官。得李君祖惠。顧君朝宗。陸君燦。俞君經。施君禮耕。賀君宗賢。馮君萬年。七人。而李君祖惠以老名士馳聲於大江南北。幾五十年。得冠榜首。出門下人皆服府君知人。主考李鶴峰先生贈府君詩。有句云。吾宗有墨綬。岷峨發精英。乍如得荆璞。價重十二城。遺我共欣賞。古色果崢嶸。蓋深爲得人慶也。次年卽補餘姚。姚巖邑也。濱海。自上林至蘭風。七鄉通錢塘江。橫亘八九十里。有大塘。新塘。周塘。潮塘之別。歲久不治。雍正初年。獨大塘存而坍損過半。葉令瑄文乃勸民築堤。名榆柳塘。十二年。張令永熹。又於塘外勸築利濟土塘。以此層次保衛。顧旋築旋坍。海潮仍爲民患。乾隆十二年。潮忽大至。淹沒民田四五萬畝。前任王令請帑一萬七千五百餘兩。各灶修築。謂之以工代賑。未幾王謝病去。十五年。府君到任。時值防秋。七月十六至十八日。颶風挾雨大至。吹

瓦拔木。三晝夜不止。府君戰慄。乃跪庭中。祝曰。海地窮民。甫離災難。若天不降康。堤潰水溢。民其爲魚。水旱頻仍。罪在長吏。願身受罰。爲此方民。暫延殘喘。祝畢。隨分役查看水勢。天微明。廟山巡檢俞漣馳報。水幾潰隄。賴東南風大作。而潮竟不至。人皆以爲府君至誠所感云。姚邑賦重民頑。爲盜賊出沒之藪。府君到姚。點視案牘。賊未及獲。而首犯在逃者百餘案。乃銳意除盜。立比期。懸賞格。一時小賊多擒。而巨猾依然脫網。因思緝權不可專委。捕快因密錄難獲猾賊四五人名於票。夜喚皂隸李兆民壯。妻恩至署。出票袖中而諭之曰。賊某等現藏某所。爾若依限獲。受上賞。否則革役。二役唯唯退。不三日。積賊景三擒至。內外無知者。又十餘日。而逸賊張子顯。張文紹。陸通儒。鄒士元。繆允年。孫善平等。先後就擒。審出屢次行竊。及賄囑勢豪州同楊某。串捕庇縱。各實情。通詳分別軍流抵罪。而重賞兆恩二役。合邑驚以爲神。乃將小賊別立一局。名曰枉生所。關賊局中。自捐俸鈔。給以口糧。使城中坊舖有執業人。如梓匠餅師之類。使爲賊師。並假官錢以爲資本。使賊學其技藝。漸能熟習。使其師具呈保出。以是人多感悔爲良民。終其身不復作賊。上憲大加稱賞。並飭諸縣頒行此式。詩值荒災。府君記算戶口大小。先使人密訪實數。以故奸吏侵蝕。立能指摘。制府按臨查災。府君隨制府乘輿。凡某都某圖。皆能口說手畫。如指上羅紋。一絲不紊。人俱服其敏。諸設立姚江書院。延李君祖惠爲院長。使諸生肄業其中。刻有姚江課士錄。凡先君所刻文。姚人俱編爲一集。名爲石亭公治姚紀略。互相歌誦。丙子八月充房考。又得士七人。王君學濂。汪君治。錢君大鯨。王君世維。黃君璋。黃君墉。施君純熙也。不孝調元是科。應本省鄉試。下第來浙。九月調繁秀水。二十

二年。恭遇皇上南巡。秀水爲全浙門戶。上憲以府君精幹。使辦頭站大營盤。府君日夜運籌。竭盡心力。不孝調元等一處安臥。而不見面者。凡三閱月。於城北窪地填起園亭。一望花園錦簇。供備直壓兩江。大差事竣。卽調署平湖縣。前縣令翟天。七年高臥。一應詞案。積至三千有奇。凡已出票者。俱不審理。一任胥役詐騙。民不勝拖累之苦。府君到任。黎明坐堂。三鼓方罷。每日分三刻。立定自課章程。早審若干件。午審若干件。晚審若干件。先期掛牌。坐大堂。三餐皆小碗碟。送堂上。大開頭門。聽民觀聽。每審一案。暖閣邊擁擠千人。莫不拍手呼快。或衆中有心未服。而不敢言。府君必招出委婉。商確更定。且以信服民。掛牌從不改期。以是積案爲之一清。先是乍浦多賊。鷄犬無寧。府君復捐俸。修大廈數十間。名曰自新所。關賊其中。教學手藝。一如餘姚之法。居民安堵。幾於夜不閉戶。故當日有七年如雲煙。兩月見青天之謠。奉部駁。仍回秀水。去之日。焚香送者數萬。哭聲震野。如失父母。不僅脫靴立碑。衣傘之踵至也。旋蒙兩浙中丞現任直隸總督楊制軍廷。以府君爲天下循良第一。保舉堪任知府。其入奏。有承辦一切差務。俱盡心竭力。不辭勞瘁。洵屬通省中有爲有守之員等語。未經引見。丁先王父憂。府君哀毀骨立。水漿不入口者旬餘。然新任未到。坐草薦決事。筆不停。披抱傷慘。而應繁劇。幾成癆瘵。戊寅春回里。營措喪事。巨細經心。盡一年葬先王父於祖墳之雲龍山。是科己卯。不孝調元赴本省鄉試。府君送入成都頭場。畢。以草稿呈府君。府君喜見鬚眉。謂親友曰。吾子魁矣。榜發。不孝調元果中第五名。十二月。不孝調元北上。府君送至皂角舖。示以長句。有昔我登龍二十九。慚愧鑿坡非我有。汝今年小志方強。健翮摩空未可當之句。蓋自傷壬戌館

選不預。而以劾不孝也。庚辰。不孝下第。府君服闋來京。同寓邸店。七月。府君補行引見。保舉堪勝知府。奉旨發往直隸。以同知用。時攜不孝調元移寓於大馬神廟之戶部郎中梧桐先生查虞宅。歸謂不孝曰。官爲大夫。正當圖報。以是月攜不孝至保定。八月。委署滄州。州爲四方積盜之窩。各省指名提犯者。紛如落葉。府君先按村莊。人數造戶口清冊。冊內載各村男丁年貌。按冊探索。無不弋獲。以是遠近提人犯者。隨提隨得。前任直隸制軍方公承深嘉之。辛巳。恩科。不孝調元以會試薦卷取中副榜。充內閣中書。與國子監學正。人稱爲中正榜。府君與書曰。紫薇舍人與國子先生。最極清貴。將來鼎甲之基也。勉之。壬午十一月。署涿州。所謂天下繁難第一州也。王畿總匯。差使絡繹。府君日則應付十五省驛務。夜則審理詞訟。倥偬之中。自覺游刃有餘。時涿方災旱。奉旨賑濟。府君嚴查胥吏。務使均沾實惠。復自捐俸煮粥。加賑一月。時不孝調元補國子監學錄。府君召至盧溝橋。謂曰。終成進士。乃佳耳。明年癸未。不孝調元會試第二名。捷音至涿。府君諭曰。旣成進士。又喜高魁。然不得翰林。不貴也。閱月。不孝調元殿試二甲十一名。擬鼎復失。府君諭曰。翰林與鼎甲。固無間也。五月。御試第五名。選入一等。欽點翰林院庶吉士。府君書訓。不孝曰。館選可以酬讀書之志矣。但須刻意詩賦。方不愧爲詞臣。汝其勉之。九月。題補天津府海防同知。甫到任。卽奉差查南岸河工。途中聞先王母訃。府君卽日奔喪。傷慘尤甚。不孝送至涿州十六里蕭寺中。拜別。府君謂曰。汝可回矣。大司寇味經先生田吾與汝同師也。嘗謂謙卦六爻皆吉。此一字。可以奉之終身。戒之。歸里後。安厝事畢。爲邑侯楊公周冕所聘。建東門石橋。造魁星閣。創雙江書院。蓋楊公以府君精能。

信實。賴以濟事。而府君亦欲倡起人文。不辭繁瑣。故居家三載。亦席不暇暖云。丙戌。不孝調元散館。改授文選司主事。府君將來京。途中聞之。書諭不孝曰。衙門雖改。官階轉優。況天官爲六部之長。而銓曹最清要之地。汝須留心部務。和好同事。取重上官。精神自惜。而才華收斂。則老父可無憂矣。不孝調元謹拜命。不敢忘。府君抵保定。卽署霸州。又署薊州。皆甫閱月。卽卸事去之日。父老攜幼泣送者不絕於路。丁亥。提補宣化府同知。駐新保安。城孤人稀。竊賊最夥。府君立查更之法。以紅布製小旗三十二面。半爲守旗。半爲望旗。蓋取守望相助之意。夜先以守旗傳各巷巡夫領去。四更遣人另以望旗換回。天明卽令巡夫當堂驗旗。如非望字號者。查出立責。以是地方寧謐。奸宄潛蹤。府君以地僻無事。攜孫朝礎前往自課。戊子四月。調順天府北路同知。尙未引見。卽委辦平谷城工。府君往來城上巡視。一磚一石無不過目。又署密雲。承辦木蘭大差。是時十日晴雨間作。府君日夜親身督辦。不避風沙。馳驅塵泥中。不得寢食者凡兩月。又兼以審理剪髮案。已得誣陷實情。而詳稿未定。行在軍機大臣差筆帖式提犯。府君不肯給發。爲軍機所參。旋蒙本道明公面稟大學士忠勇公。以府君實屬能事。其勒犯不發。乃傳聽之誤。奏請寬免。奉旨仍回原任。府君以聖恩高厚。思報萬一。乃於回鑾之日。俯伏道旁。恭接聖駕。請罪謝恩。蒙上垂問曰。你是李化楠否。會辦事。已饒了你了。府君摘帽叩頭。上回顧大臣笑曰。這胖官兒可謂強項矣。府君軀素壯大。故云。人皆謂府君半世辛勤。得邀天語褒嘉。遭逢實爲難得。開府當在目前。而不知心力兩勞。病亦從此伏矣。時新制軍卽前任浙撫楊宮保公。爲府君一生知己恩憲。又備員屬下。道出密雲。聞此信亦深嘉之。

府君亦自謂有緣。不惜鞠躬報効。而制軍亦深信府君忠誠可托。方欲保薦大用。而府君旋卽去世矣。嗚呼。痛哉。今年四月。不孝譚元奉侍宜人來直。闔團圓之樂。乃不孝譚元北闈下第。而正平谷喪七弟。在密雲喪八弟。運數乖蹇。無一遂心之事。又兼公務勤勞。刻無寧晷。雖到京一過。不孝譚元欲得從容奉饌。不可多得。十二月十九日到京之時。不孝譚元先爲本部堂官保舉。堪勝直隸州知州。私心以作京官久不諳作吏。且目擊府君作吏苦辛。是以遲遲欲辭。請之府君。府君曰。功名有定。朝廷官豈可擇著做耶。旣而引見未用。府君聞之謂不孝曰。可謂天從人願矣。遂往盤山而去。然不孝竊窺府君精神恍惚。再四請問。又不答。二十四日過京請安。府君謂不孝曰。我前日病。今清白矣。是夜宿不孝寓。不能寐。復起飲酒。盡一觥。乃稍稍臥。先是壬申在餘姚。亦以勞心過度有痰迷之症。已經痊愈。不發者十七年矣。是時府君早起。坐不孝調元於床沿。謂不孝曰。我病中恆恐恐然。似是怔忡。今雖好。然心內懸空。急需以補藥調養。命不孝抄方隨帶。不孝以府君語言明白。絕不疑前症之發。嗚呼。孰知二十七日。於保府舊病忽發。痰氣上迷。竟致不救。相隔才兩日。遽成永訣哉。府君爲人壯貌雄偉。氣度豁達。而一種磊落英爽之概。恆使人對之而生敬。平生樂談陰陽。奉行功過格。惟謹。期於累萬。故匾其廳曰。萬善堂。每云。白日莫閑過。每日須撫躬自問。必作有益之事數件。方不負此光陰。遇事鎮靜。終日無惰容。故他人每驚疑未定。而府君一言已決。且料事多奇中。然精明中常存渾厚。絕不討人便宜。曾鑄吃虧圖章。以自警。處家喜儉約。衣帽但取溫暖。登仕後始脫布袍。然終其身未嘗穿一華服。自供不過腐菜。常曰。咬斷草根。百事可做。性極孝。先王父母。

在日旨甘必親調。出外必屬宜人烹飪如法。所著有醒園錄。人皆傳抄。先王父六十雙壽大慶。在浙徵詩。彙成部。名曰鴻案珠園。遣人竭水陸之徵以獻。旋因先王父愛田園之樂。不肯就養。祇迎先王母至浙。公退。輒侍坐歡笑。依依如孺慕。友于最篤。一飲食必相共。未嘗頽顏。對宜人尤相敬如賓。從未怒聲疾色。教子以義方。嘗謂父子不責善。故失禮處輒委曲開導。不孝調元自服官以來。所寄手訓較先正格言尤精。故裒爲一冊。藏爲家傳。以見府君無事不可對人處。重族誼。先是獻賊之亂。族譜已失。府君捐資重刻。自高祖諱厚而下定爲五世。作宗支派歌四句以相傳衍。捐地立祠堂於雲龍山之腳。買祭田廿畝。清明埽墓。冬至則演劇於祠堂。血祭畢。合族綴食。每歲爲例。愛賓客。至則豐酒款洽。竟日。故蓬門外輒車馬喧闐。與人交始終如一。馭下嚴而有恩。隨才器使。不苛小過。故莫不出力思報。而其居鄉也。尤能和睦鄰里。有紛難者得一語輒卽排解。好周急。乞貸者必量其意之所欲以與之。負者亦不與校。親友相招者必步行。恐騎從擾人也。途遇鄉戚。雖年極少。馬必下。以是遠近翕然同聲。兩遭大喪。弔者數千人。半有不知名姓者。亦盡哀而去。時邑侯楊公嘗以事過南村。見百里內皆白衣冠。歎曰。此李公德所感也。故每出仕。送三舍者常百人。其得輿論如此。其在官也。總以愛百姓爲主。從未妄出一票。曰。一點硃不要緊。受票傳者必一路哭矣。約束吏役甚嚴。在直辦差。所需車。出自閭閻者。雖甚澤。概屏不用。但就各吏役家所有。先使人查封。再出重價以償。既不誤公。而吏役亦因以獲利。故公事叱嗟卽辦。且慣習勞苦。遇有差委緊急事。雖闕渡深淖。每策馬先涉之。陷大渠中。濱死者幾數。以是人皆用命。在滄時緝賊不用健捕。令四鄉里正就

所知之犯稟報。卽擒。當堂給銀牌花紅以旌之。鼓樂送出遊街。故所在地方少免脫之賊。重讞獄。不好刑求。先使盡其詞。復虛衷以聽之。必水落石出而後已。有犯重罪者。求其生而不得。然後定案。往往有身在牢狴而焚香頂謝者。曰。我死固當。難報李公心耳。以是上臺審理參革重案。輒以委府君。旣成信讞。復經他員翻供者。府君必面請上憲。另委賢員。卒照舊案歸結。如在保易簧之前。所審任某一案。其明證也。所著有治姚紀略二卷。精律例。刑名不請幕賓。處繁劇。一切文案。皆手自批發。嘗謂人曰。做官有六字訣。眼到、心到、身到。得此訣。則閻人無權。而一應舞弊事庶可稍清。敏於稟啓。每倚案起草。數背膽真。嘗苦不及。與友人書。寥寥數語。而詳明周到。蘓黃尺牘不逮也。府君素清廉。兩次監密雲。懷安。城工。及居庸關。碑亭。皆自攜餅餌。凡地方供給皆不受。卽家人亦不敢受一錢。是以上臺器重信服。凡歷任府廳。州。縣。十一處。承辦大工十餘起。上臺每躊躇不得人。輒曰。非老李不可。先是府君垂髫時。已立志爲名宦。與羣兒戲。自爲假官。旁列書吏皂役。使兩兒設爲兩造。各以訟呈。有狡黠不以理訴者。卽變色重撲之。羣兒往往受杖而泣。先王父窺之。謂人曰。吾兒他日必爲老吏。觀斷獄可知也。迄今追憶。乃知其驗。府君工吟咏。春秋佳日。輒以詩酒自娛。凡鄰里過從。招飲索留句者。輒卽席賦之。所著有石亭詩集八卷。現任侍御劉乙齋先生諱天成爲之序。尤熟於韓蘇詩。能暗背全集。有手選各大家詩數卷。擬刊未果。喜書畫。官餘姚日。召不孝調元。譚元。來浙攻書。延名師課讀。以川中書少。遍購古今書籍數萬卷。以舟載至家。造萬卷樓以藏之。命不孝調元偕己卯孝廉陳諱灃者。釐定正僞。分經。史。子。集。四門。編書目十卷。名西川李氏藏書簿。作序。

以紀之曰。此吾宦囊也。畫則斷自宋、元、明而下。如趙、倪、沈、祝輩真蹟。尤所酷嗜。鑒別尤精。見絹紙色卽能辦其真贋。所著百餘軸。製一大櫥藏之。歲時撫玩而已。精算法。歸除、因乘、俱極錯綜變化之理。居官時丈量倉儲。有積年老吏不能算。而府君彈指數聲。毫釐不失者。好騎射。在滄州任時。曹家等莊多回賊私宰耕牛。日則聚飲以爲樂。夜則四散爲奸。列任官俱無可如何。府君訪知。忽三更起持弓矢。率領健卒百餘人。突至其地。悉擒治之。不孝調元嘗以蹈險爲諫。府君毅然曰。豈有畏盜官耶。調北路文武兼轄。有額設捕盜兵百餘人。日夕操演。躬自校射。設堞百步。每發必中。營汛弁員等無不駭服。平居暇餘。常率不孝調元及家丁等於場圃較射。曰。此亦運甓之意也。以故所歷之地。無不關有箭道。喜種花木。自浙歸來。築補過亭以爲優閒之地。以少隘。又於祠堂前購一別業。扁曰醒園。丹徒王夢樓先生諱文治所書也。構造迴廊花庭數處。有牡丹臺、天然床、望江亭、諸勝。所藝梅、杏、桃、李、梨、栗、柑、橘、松、柏、果、幾及萬株。外以土垣圍之。使忠實僕柳發看守。澆灌曰。俟我歸老必成林矣。此吾天年之樂地也。嗚呼。痛哉。孰知十年之計已成。而萬里之魂未返。悠悠蒼天。此何極哉。生前不留一言。臨別未及一見。大小數十口。或孤懸於塞上。或散處於京師。囊無一錢。家在萬里。笑笑若此。府君其忍棄不孝等而長逝耶。嗚呼。痛哉。府君生於康熙五十二年閏六月十四日午時。卒於乾隆三十三年十二月三十日卯時。壽五十七歲。原娶宜人羅氏。諱兆鰲。公第二女。以不孝調元官內閣中書誥贈宜人。先府君去世。繼娶宜人吳氏。諱廷桂。公女。誥封宜人。子三。長不孝調元。己卯科舉人。癸未科進士。由內閣中書補國子監學錄。欽點翰林院庶吉士。授吏部文選司主

事。宜人羅氏出。娶胡氏。庠生諱昇公第五女。勅封孺人。例封安人。次不孝譚元。國學生。娶熊氏。國學生。諱曰復公第四女。宜人吳氏出。次聲元。繼胞叔諱化榿後。庶母史氏出。女二。長適庠生曹諱錫寶。宜人羅氏出。次適儒業何諱人鳳。宜人吳氏出。孫二。長朝礎。十五歲。不孝。調元出。次朝磐。甫週歲。不孝。譚元出。孫女三。長字現任劍州訓導。何諱人麟。長子。次字壬午。科舉人。呂諱林三子。三未字。俱不孝。調元出。苦次咽鳴。不知所云。

童山文集卷十九

四六上

恭謝欽賜御製全韻詩及擬白居易新樂府摺奏

乾隆己亥年五月十八日奉軍機處傳駐京提塘劉瑞年領欽賞廣東學政臣李調元御製全韻及擬白居易新樂府各一部到臣謹恭設香案望闕祇領訖

伏惟我皇上德叶韶箴。道宗河洛。創成鉅製。綜百六部全聲。別著洪裁。播五十章樂府。洵矣典謨之奧。猗歟功德之隆。述聖神文武之鴻圖。風雲動色。寓褒貶勸懲之大法。日月長懸。超三百篇而立則。豈百家能出其範圍。彙四千載以成書。將千古其尊爲圭臬。臣愚同捫籥。學愧寒竿。已幸叨玉尺之衡。復恩被瑤編之錫。荷天慈之下逮。榮幸難名。仰聖學之高深。廣揚靡罄。爲此繕摺恭謝隆恩。

恭祝萬壽百韻詩序

伏惟我皇上紹統乘符。循璣立象。顯清輝於斗極。受靈筴於泰元。尺五雲霄。雀獻昭華之瑄。大千世界。龍呈宛委之書。固已月晷含祥。乾維效氣。塵清九服。外銅鼓於戎亭。瑞卜三登。耀金船於靈沼。茲屆上章之歲。適逢聖壽之期。香動萱階。榮生桂闕。黃暉煥彩。捧來五色之雲。紫玉摘英。鑄出長生之字。合圖書者。數千百所。敷文德者。四十五年。分衽席以同春。盡輪裳而稟朔。而且西戎奏捷。矢落天狼。四庫搜奇。字釐帝虎。鑿空萬里。秋生苜蓿之風。採錄百家。香動蒲萄之錦。武功彪炳。文治光華。旣庶事之咸康。斯一人之有

慶加以詳求民隱。懋復時巡。飛芝蓋於南天。啓紺轅於北闕。平連齊魯。河聲嶽色之間。時協風雨。葛葉杏花之外。幾程綠水。箔是琉璃。一路青山。圖開金碧。然而睿慮方殷於澤國。宸遊豈玩夫物華。燭白璧以成河。駐翠華而望海。蛟龍氣靜。不馳竹箭之流。烏兔光清。常見扶桑之樹。無憂蟻孔。金隄則紅豆一條。齊發魚鱗。石鍵則雲連百里。況乃恩敷赤縣。膏被蒼生。木鳳銜書。芝沍九莖之露。金鷄放赦。草蘇三日之霖。暢士氣於槐宮。扇芳草於萃野。青旂蒞止。不費酒漿。曜髮來迎。報之蜜麪。揚壽考作人之化。道穆垂裳。聽康衢順則之謠。風同擊壤。維帝包元而履德。維天墮社而發祥。是以波動榮光。山傳靈響。千官劍佩。遙承吉慶之花。萬國衣冠。共譜昇平之曲。神符太乙。合東西南朔。以清寧。星燦長庚。並日月岡陵而綿固。生聖人有道之世。仰企龍飛。誦天子萬年之章。願爲虎拜。敬陳篇什。用代賡歌。

冰清玉潤集序

老夫耄矣。未能借少年遊。童子何知。偏不喜與俗人伍。然南村晨夕。長憶淵明。東瀼風烟。恆思子美。則其勝事。有足志焉。余家醜園。舊爲石亭菟裘之所。營成別墅。似在李愿盤谷之間。然俯澗依岡。勢雖空曠。連巢并壘。地少紆廻。爰因樂水之懷。還作買山之隱。人非東野。地似西湖。引溜栽荷。當門種柳。閣以崇而樹合。徑以曲而花分。醞酒臨池。可側山公之帽。焚香掃石。堪彈謝傅之棋。于以息焉。亦足樂矣。夫一邱一壑。謝幼輿置身巖中。半水半山。仲長統心遊物外。此固幽人之逸致。實亦曠士之素心也。然地有名山。飲酒難逢知己。人雖勝士。吟詩須對會家。惟吾塔字號玉溪。真同玉潤。心無冰炭。却映冰清。豪似元龍。齊襟期。

于湖海。俊同司馬。傲意氣以雲霞。省試空冀北之羣。一時價重。訪余至蜀西之勝。十日款留。維時秋雨初晴。朔風未冽。深林着屐。高榭披襟。坐明月之二分。當雄風於千里。而吾壻每從容次和。先得予心。抽架上之書。嘗窺鴻寶。探囊中之鏡。早獲驪珠。響出行間。不驚人而不止。香生楮外。每遇物而偏工。五字城高。得隋州之俊爽。六朝體麗。有開府之清新。遂疑歌有琴聲。詩含畫意。余也江淹已老。愁無夢裏之花。韓愈漸貧。空誇囊中之筆。攜百篇而登百尺。老夫須讓出頭。每一題而歌一章。此人不可無一爰。取樂衛。自相品題。集效蘇黃。遂成佳話。正所謂蒹葭倚玉。蓬華生輝者也。則讀其辭者。當以薔薇浣手。思其度者。比之芍藥生姿矣。

祝漢州牧胡一峯六十壽序

今皇上御極之元年。塵銷五嶽。聽鐵馬而無驚。慶協三辰。卜金羊之有喜。臯夔在位。鼎調水火之爭。方伯連州。壘壯山河之氣。澄清半壁。上游無非謝公。綏撫方隅。中間更多召父。而我牧伯一峯先生。浙水高門。川中名幕。爰由邛郡。移署繩鄉。王休徵望重三公。先著海沂之績。陳中舉名高一代。暫收荆楚之功。將大行焉。有所試矣。乃若先生。神遊象表。學架區中。本自游龍。所至輒興雲雨。常爲鳴鶴。由來直上雲霄。委屯務者三年。去則父老攀輿而泣。從邊隅者萬里。還則露布倚馬而書。障東逝之百川。閩中之金城永固。排西流之故道。保寧之全境無虞。而且庠序粵新。人文蔚起。民風還樸。訟事不興。昔處閒況之曹。揮毫無暇。今掌劇繁之縣。游刃有餘。清心常湛冰壺。庭下時看瘞鹿。妙用恆同玉尺。案前不爽燃犀。用法無私。不挫

庖丁之鋒鏑。臨文靡忽。偏窮旁午之紛苛。方坐理于巴西。春風爲之拂座。迨分猷於廣漢。膏雨遂以盈郊。開門興子固之謠。滿道感季方之化。東臯布澤。牛不喘於田間。北野徵糧。蚨欲流於地上。是以祈雨則甘霖立沛。多稼如雲。對民則霽顏以詢。三冬亦暖。愛之如慈母。敬之若神君。論其德。直上溯胡公之屬。而莫加。論其清。不啻祖胡威之絹。而更勝。譬之光弼寧戎。旌旗遂爲改色。一若武侯作相。壁壘頓以殊觀。誰謂治中不足展百里之才。長史未可入九重之聽也哉。昔公琰負社稷之器。竟掌鈞衡。子通具文武之才。旋膺封爵。而先生簪纓行於當代。圭組盛於列朝。是以龍章寵錫。白髮邀恩。鴻案珠圍。齊眉共慶。塔列三株之樹。瑞氣森森。屏列四照之花。祥光鶴鶴。某也。快聞弦於入邑。已知趙軌能清。及奉塵於登堂。更識劉宏有禮。蓋半生慕義。久懷嵇阮之清。而兩世論交。實見紀羣之雅。名傳黃口。信今日所希逢。頌比青天。實古來之未有。迺者。戊戌之月。將乞算於北辰。乙卯之辰。且注齡於南斗。距黃花之九日。序隔四朝。當白雁之三秋。筵開六秩。滿城耆叟。咸歡舞以躋堂。闔邑兒童。亦謳歌而遍野。君子歌無疆之祉。小人慶難老之章。客盡持觥。望青牛而東度。予將吹笛。奏黃鶴以南飛矣。

祝綿州州尊王雲浦六十壽序

蓋聞循良之傳。兩漢列於編。慈惠之師。三河稱於表。是以寵茲賢牧。別造玉麟。秩進上公。專馳畫鹿。然而事權不久。才或未竟。其心利器無分。功或有違於志矣。而況飛芻挽粟。地當水陸之衝。旁午軍書。屢屈兵興之役。非藉撫綏於召父。難期含鼓於堯民。茲幸太尊雲浦先生。用德爲才。以仁行義。靈鍾彭蠡。廬陵本

文獻之邦。派衍瑯琊。豫章實多材之地。杏園對策。摘文丹鳳樓前。棊水鳴琴。建績冉駹境上。遂領瀘江之重鎮。迭署重保之名都。三捷名傳。羨書生乃能辦賊。一麾不次。信天子不肯負人。由資而達。而忠幡熊屢度。爭栽百尺之棠。由茂而酉。而綿竹馬初迎。已秀兩岐之麥。或謂公清若水。咸言君惠如膏。比人在於鏡中。神明可感。若兵過於席上。保障無憂。不知存不忍以爲心。本無私而出政。憫勞人之已困。惟愛人不致傷人。識多事之維艱。欲省事遂成無事。何煩破柱。蒲未試而先威。罔待投書。雍相傳其自拔。冰壺皎潔。笑劉寵何用一錢。玉尺溫良。較廉公寧唯五袴。化行無欲。績報有成。茲當星見之期。共獻日升之頌。人皆云。年豐由於人壽。而不知家慶實承國恩。蓋先太翁由黃甲而登黃堂。爲父子一門之盛事。故我公既善繼而兼善述。居兄弟兩難之中間。唐棣叶翩反之華。同居實同張藝。井臼得齊眉之助。相敬無異孟光。以故膏雨和風。四邑之謳謠既遍。而怡聲柔色。一庭之孝養彌歡。蘭桂森森。無非廟廊之器。芙蓉葉葉。堪充獻壽之杯。耆叟咸踴跳以躋堂。兒童亦懽騰於道路。將見頌無疆之福。盡四邑以皆然。慶難老之詩。合萬家而共祝矣。

祝周母鄒孺人六十姚孺人五十合壽序

南邑夙號名區。周氏尤爲著族。相承朱紱。代有聞人。獨富青箱。時多秀杰。自郴州公辛酉鹿鳴。與先君吹笙鼓簧之誼。嗣文安公庚辰龍變。復與予訂投縞贈紵之交。因悉棣鄂八人。俱有元愷之目。中雖桂攀三雋。不出廚俊之稱。樹在堦前。珠皆照乘。珍當席上。玉盡連城。竊嘗歎此寧馨。乃復聞其懿行。則鄒姚兩孺

人共家事有足稱焉。鄒孺人系出考父。籍居武昌。幼毓蘭蕙之姿。早習蘋繁之訓。振佩出延陵之室。將車歸江夏之庭。謝馬氏之資裝。偏能椎髻。操梁家之箕帚。但遇澣衣。洗手調羹。獨得□□之性。齊眉捧案。恆同君子之心。姚孺人家在□□□□□□。蓄德早著。聲于三黨。承歡尤盡。禮于一□□□□□。前咸推櫛士。每縫裳于牖下。亦號針神。雁借弋將。雅叶彈琴之操。鹿車既挽。爰修提甕之儀。問夜相求。聞鷄有戒。登堂饋食。叱狗無聲。凡此皆兩孺人閨範所由來。爲閨闈之創見。繼因長尹。迎養高堂。旋聞舅翁。已捐館舍。一則四子。年甫垂髫。一則三兒。齒皆黃口。廿年夜雨。鳴機同和。誦讀之聲。半世秋風。斷杵共警。搗砧之夢。養雛成鶴。誰憐寡鵠。淒涼。有子雕龍。肯惜和熊。膽苦。六十年之歲月。罕窺喜怒之容。五十載之風霜。辛盡劬勞之力。是以鯉庭奉教。圭璧之譽。日隆。鸞寢無憂。鍾釜之怨。不作。由是立身行道。皆因畫荻之所成。卽此顯親揚名。難保丸參之所得。洵足配美於栢舟。允堪流芳於史策。茲者月當孟夏。歲在甲寅。兩壽筵開。啓璇堂而懸彩帔。雙逢桃熟。帶玉筍而舞斑衣。鶴髮宜年。欣逢添屋。龍章錫嘏。喜見開樽。而兩孺人膺三錫之榮。神明益茂。備六珈之禮。齒髮未雕。顧我不文。虛備官于太史。念予世誼。許效祝於華封。爰從雲谷之書。兼讀書倉之序。乃抽兔穎。用啓鮎顏。昔曹大家之淑範。用享高齡。宣文君之令儀。因登上壽。況乎三鳳既鳴。造樓尙餘五鳳。雙龍同躍。下食還有六龍。佇見兩兩邀封。起居八座。重重待祝。遙賀百年矣。

祝張太翁劉孺人七十雙壽序

蓋聞書稱五福。並美遐期。詩咏百年。同推洪算。是故金公木母。流傳曼倩之桃。椿樹萱花。並紀安期之棗。

欲知無美之不具。須識有開之必先。惟我敬翁太先生。系出清河。家原鄰水。青虬馭節。萃維嶽以來。歸黃鶴。翔軒應列星而誕降。門垂舊德。戶啟新祥。夙負英姿。幼惇至性。馳芳聲於學校。國士誰雙。振異采於詞壇。文章罕儷。關西夫子。盛德堪儀。東郭先生。清修足式。燕山萬竈。常借晨炊。薛邑千緡。每焚宿券。排難尤推郭解。驚座不減陳遵。至于塾訓睦嫻。家敦孝友。春秋逾劬。日月彌高。尤其里誦太邛之賢。州崇叔度之化者矣。至於內助維賢。實與外言無間。如我劉太孺人。陶唐之孫。代多賢士。彭城之裔。世號華宗。早著令聞。夙嫻閭範。柔嫻慈孝。出自性成。言德容工。不從人授。既鼓瑟以合昏。便舉案而齊眉。南阮名流。不繫情於犢鼻。仲卿佳士。豈嘆困於牛衣。躬親操作。寒暑不辭。身任勤劬。晨昏靡倦。紉箴佩帨。曲承堂上之歡。饋食餉田。詎慚廡間之事。而又熊丸佐讀。晝荻陳書。雖同鄒母。不煩徙宅之勤。未授雷池。竊慕封鏹之意。抑又可以兼郝鍾而較勝。軼桓孟而無慚者矣。凡此儀型。足追往哲。仰茲懿行。定啟後昆。以故篤生令嗣。偉爲望人。素號書倉。久推學海。蜚聲疊序。居然荀氏之龍。揆藻文壇。不下邳家之鳳。選膺青錢之萬。獨奮垂大之雲。獻雖白玉之三。終破乘風之浪。惟其鯉庭有訓。是以鵬翮終養。久坐鄭度之氈。常思視寢。忽捧毛生之檄。得慰承歡。迄今丁酉之首春。正屆高堂之七秩。人開壽域。天錫昌辰。錦筵麗以初陳。異香遠而不散。衙開薊北。梅芳競曙雪之先。瑞滿燕南。介酒恰元宵之後。借竹馬兒童之舞。全當老萊。採杖鳩父老之謠。移稱杜母。況夫嶄然頭角。盡是渥水之駒。森爾蘭芽。都是藍田之玉。金甌濺水。玉笋傳觴。斯亦東海不足。以添籌。南山不足。以比福者矣。而乃九重錫詔。頻膺紫泥之封。百姓傳觀。永作黃髮之式。斯時也。賓從

如流榮華似海。董雙成之寶瑟。調發雲璈。王中散之行廚。肴陳麟脯。即使他年集福。應期願而更多。何況此日同栖。又駐顏而返少也哉。

童山文集卷二十

四六下

祭諸城相國太傅延清劉文正文

嗚呼。地坼幽燕。山頽秦岱。仰泰階而曉落。指台宿以宵寒。九重聆訃而咨嗟。臨朝罷講。百辟聞薨而震愕。奔奠盈衢。蓋隕厥元良。固普天之所共慟。而喪其表帥。尤羣屬之所私傷。惟我相國。裔接陶唐。族高齊魯。秉清剛之正氣。挺純粹之明姿。早馳譽於清華。歷邀恩於上苑。論遭逢之盛。蓋漢唐名相之所絕無。溯功業之隆。實姚宋諸臣之所未有。當其應期命世。維嶽降神。穎異少年。飛騰中歲。浩浩百川之學。汪汪千頃之文。金殿臚傳。羽儀三署。玉堂佩委。袖領羣仙。四海顛望。夫東山三應。競推夫南董。書抽烏冊。五丁能役。風雷錦出。龍梭六朝。不誇月露。北門實資。鎖鑰東觀。盡博圖書。金馬承明。鳳詔宣從。乎楓陛。瓊條插羽。鸞坡路接。夫槐階。遂爾聖眷。彌英天綸。重播探花秋實。白鳳鳴祥。輔翼春闈。黃鵬頒賜。內廷入直。早知頗牧之在禁中。當殿宣麻。爭傳許燕之立朝右。至若容臺秉禮。麟閣推三禮之宗。重席談經。虎觀重九經之庫。詩歌則陶情寫意。歎玉溪昌谷之非工。纂錄則摘奧搜奇。哂夾漈貴輿之未博。石渠諸子。聆而傾心。金匱羣儒。望而咋舌。況復平衡乎水土。因而敷歷乎外中。位應三台。淮海望中丞之節。階崇八座。河隄行使者之車。洪荒免百姓之魚。舟楫殺陽侯之怒。功齊神禹。治贊唐堯。若乃袞衣繡裳。借哲人於臺閣。朱旗絳節。

資文學以保釐。如馮翊之屬蕭。比潁川之借寇。總悅來蘇之雨。士瞻采芑之風。建牙據察吏之猷。胸如觀火。弭盜著安民之略。面若凝冰。至於屢掌積運之權。暫綰挽輸之寄。鄴國足關中之粟。武侯屯蜀地之租。身臨貔虎之軍。月明黃鉞。念切麒麟之象。雲掃白旄。因遺大而投艱。遂懷遠而柔邇。惟不爭乃能不辱。知奇事必出奇人。當夫歸入九重。位高百職。身鄰斧戾。口吐絲綸。眷鳳重於覆甌。任獨隆於和鼎。陰陽隻手。玉燭調宇宙之平。霖雨片言。金鏡納乾坤之大。賜第葺連平樂。入朝兵衛羽林。面折廷爭。人憚王陵之躓。老臣臥治。天憐汲黯之忠。東閣儒生。經筵而推老宿。西番酋長。來朝而識大人。洵爲名世之鹽梅。真是熙朝之鼎鼐。由是兼綜部務。總攝卿僚。本屬宗伯之總曹。長典秋官之重寄。恩流丹筆。先立平反之科。望重白雲。人有不寃之頌。正刑糾慝。國無害馬之倫。剪暴詰奸。市化飲羊之俗。邇乃位隆冢宰。權重平章。爲天部之表儀。作周官之綱領。百爾咸歸董正。六合仰藉衡平。月鑑空明。懸秋宵而益朗。川流澄澈。當潦盡而彌清。正以率人。不讓清平之琰玠。公以持己。自媿無滯之裴王。此其激濁而揚清。尤屬超前而絕後。蓋嘗親炙公之丰采。總計公之清操。履忠順以事一人。持廉節而光百辟。獎忠直而真材屢進。懲貪污而世路肅清。默握樞機。皆匡主濟民之略。申明典制。多安邦定國之謀。終始完名。寰宇瞻其丰采。後先贊治。朝廷重其典型。因其庶績之咸熙。益至百揆之時叙。以故兒童皆知司馬。蠻貊亦畏王商。西京則爵埒蕭曹。北宋則名齊韓富。賜書班固。代有文人。傳授韋賢。家傳名相。五十餘年三省。魏重咸陽。二十四考中書。唐稱尙父。陸敬輿之外王內聖。有以加諸李文饒之遐服。邇安無不逮也。宜乎商山四叟。歌眉壽於封留。孤竹

二君頌大年於釣渭。耆英有會。非曰一人之私。元老長留。實乃百姓之福。何意虞淵已迫。緱嶺終遙。豈真聞朱鳥之來。臯比忽而坐化。恍若跨青牛而去。鷄鳴遂以無踪。嗚呼。虎賁無可似之形。羊曇有不由之徑。客來床下。淒其百尺之樓。士集府中。閭若孤懸之榻。眞百身而莫贖。邈千載以何追。某等夙荷栽培。素叨陶冶。仰平平之無黨。實休休而有容。曲者輪而直者轅。大匠初無棄物。瞽司鼓而聾司守。至人亦許隨材。以故盼睐而附風雲。便生毛羽。唾咳而濡雨露。不惜齒牙。名愧機雲。幸受知於唐武。才慚蘇岱。謬見賞於平原。椽竹知恩。蠹桐感遇。欲作冲霄之侶。誰爲二賓。聊爲遇雨之人。衢同五父。向寢門而雪涕。屢華屋以淚零。悵述德之奚窮。撫中懷其若割。敬陳些語。聊薦溪毛。

祭曹三槐文

嗚呼。芙蓉館主。誰擁丁度之車。遮須國王。先寄劉聰之信。上天作記。李賀終亡。下地修文。卜商遂喪。駕緱山之鶴。邈矣白日飛昇。網葉縣之鳧。遐哉青霄遠舉。此固洪崖之亞。思舉手而謝時人。抑亦許邁之儔。忽穩坐而成羽化。然而景仰前型。何勝隕涕。追維盛德。可禁漣沍。竊惟年伯大人。孤竹名門。晉陽華胄。先卜居於螭螭之塞。遂定居於鷄鹿之城。秀比藍田。美如冠玉。書通六甲。史足三冬。練王氏之青箱。牙籤風動。入馬儒之絳帳。錦繡雲生。試輒冠軍。羣夸繡虎。才堪倚馬。並羨雕龍。鄙月露之形。別成六經之鼓吹。挾風霜之氣。洵稱五典之笙簧。偶逢白樂之知。遂傳燕許手筆。既識荊州之面。方知屈宋歌詞。雖屢薦而失李薦。已撫腹而咏邊韶。學道王通。何殊講義於河北。明經楊震。無異占象於關西。玉石無淆。不使濫竽之吹。

膏資有給。寧偷鄰壁之光。鶴鶴吉人。羣沾和風之惠。濟濟多士。咸沐化雨之恩。望闕里之嵒崇。使人人知由義路。觀宮牆之峻整。亦處處共出禮門。儒者宗之。士林仰矣。乃鄭度之氈。可坐。茅容之饌。誰供。爰動風樹之思。欲採白華。而致養。旋痛蓼莪之廢。徒樹萱草。以忘憂。誰知芝草中摧。遂致松柯遽掩。月照啼鵲之血。風酸孤雁之聲。哀既死而復蘇。毀亦痛而幾絕。卽此真情在我。豈非至性過人。蓋其立身行己之大端。固已超乎儕輩。而其養生送死之大節。尤爲卓絕乎羣倫者也。所以積善高門。慶衍先代。居躬樹德。佑啓後人。珠樹照映於庭闈。芝蘭並秀於階砌。擬寶家之桂。枝幹扶疎。似王氏之槐。柯葉繁茂。或駕鵬程於萬里。雙題雁塔之名。或觀鴻都於九重。並揚螭碑之字。譬之合浦。並見珠生。擬以崑岡。無非玉產。踵前規而益懋。沐家訓於凜遵。長君作宰。秀山循聲。洋溢乎南詔。次君出牧。滄水清名。遍著於北燕。而年伯大人。觀此心怡。顧而色喜。優游林下。樂有影之烟雲。嘯傲村中。受無邊之風月。山間蠟屐。耽野趣之長。水裏雀舟。占田園之樂。每當花晨月夕。子進霞觴。常隨紫陌青街。孫扶春杖。真堪樂徜徉於仙里。長翺翔於帝都者矣。何昊天之不弔。致哲人之云亡。塵栖不撫之絃。月照無人之戶。哀哀令子。拭淚迸濛。啞啞女孫。撫心痛悼。某誼忝年譜之末。素仰先輩之型。雖未獲列後進之班。趨聞提命。猶幸得從嗣君之後。側聆訓辭。方仗表率於寰區。誰謂仙遊於天上。嗚呼。乘白雲以極目。淚洒高天。登赤霞以凝眸。魂消厚地。未多樽酒。遙醉馬鬣之封。愧少生芻。敬結駒維之慕。

責實循名。固貴青錢之選。除奸剔弊。尤嫌白璧之污。仰惟聖天子。推崇學校。三年而計以成功。特選臣鄰。一旦而予之重任。司文事者。洵宜矢慎而矢公。爲學中人。更當相規而相勸。事欲勸夫後効。令不憚於先申。今本院例在應誦之條。蒙皇上疊加不次之擢。皇華之命。再到爲難。特達之恩。從來未有。奉紫宸之聖訓。心凜旌旆。每清夜而自思。涕濡枕席。期効涓埃之報。故宣藥石之箴。往者恭膺巽命。至粵典試午闈。思採白沙甘泉之真傳。欲步昌黎東坡之遺範。珠江瓊海。堪狀文瀾。梅嶺羅浮。實多鍾毓。一班之玉筍。曾收百越之青衿。繼起。今復忝持衡尺。自問敢詡甄陶。不過弟子之就正於師。無威可畏。莫言今人之遠不如古。有志竟成。大抵試案之程。以文爲重。採風之券。以行爲先。禮樂詩書。修之家者。獻之國。忠孝節義。坐而言者。起而行。然後揆藻摛芳。無非堅根固蒂。誠以旣爲四民之首。自當仰希百世之師。五典三綱。總向此中立根腳。六經四子。須知以外盡支流。制行果屬端方。吐詞須遵典則。王唐歸薛。成式未遙。韓馬熊劉。垂法尤近。文惟其是。清真與雅正齊登。理酌乎中。淺陋并艱深必斥。總以發揮聖賢之蘊。不在摭摭子史之辭。經解則一本欽編。未可就唐禰宋。古學則兼長博物。何妨陸海潘江。較武果有出羣之英豪。本院定加從優之獎拔。所慮者。複壁深岩。偶失向化。通都大邑。尤易藏奸。雖然逆億無妨。但恐賢愚不等。其或賦性驕張。行乖倫叙。居鄉武斷。名玷公庭。倚仗紳衿。挺身峻訟。稍通筆墨。作弊舞文。甚而訕謗譏評。妄誣時事。詩詞文字。不凜王章。頂替而代爲捉刀。倩傳而兼之挾策。躬不恤矣。恥何有焉。此皆郊途之必移。豈容冠裳之濫廁。至于定期考校。更務肅我場規。卷有犯法之圖。雖佳必黜。場有交頭之語。雖小必懲。甲乙面評。

決不移定衡於寮幕。早晚月照。尤不仗查察於驕鈴。得失本功名之常。原宜靜聽。是非有文章之價。尤禁誼諱。至本院鄉關僻處。並無豪貴之親朋。寒素家風。絕少寄居之宗黨。其或匪人劣棍。圖撞木鐘。指官招謠。時或因乎一面。借名索騙。貨竟不惜兼金。藏跡捕風。遍流其毒。含沙射影。莫測其形。偶或有此一條。定難逃夫三尺。至於桃李舊植。本屬公家之栽培。冠履遠嫌。豈容私門之請謁。入境以後。收刺已令概辭。考案所臨。見諒各宜隱避。凡此諄諄之誥。誠無非種種之苦心。特爲早言。無貽後悔。本院計年樹木。漫夸多士於三千。庶幾爲國得人。借報主恩於萬一。

萬卷樓藏書目錄序

蓋聞東南世族。家有簡編。搢紳先生。人稱掩浴。樓成蒼弁。葉少蘊富矣。藏書閣號清森。何元朗多兮。插架或誇連屋。絕勝擁城。吾父捧檄姚江。王陽明講學之地。烹鮮繡水。陸忠宣桑梓之邦。景仰風流。雅懷稽古。操持冰潔。不羨金籬。爰積分俸之餘。時切傳經之意。搜來兩浙江外。藏諸萬卷樓中。蠹簡芸編。零星拾得。縹囊錦軸。次第裝成。敢云盈茂先之車。聊可比鄴侯之架。無勞懷餅。庶待燃藜。調元七業未成。四經不就。一丁粗識。無異宏靖課兒。二酉徧觀。實慚賈玘教子。惟恐牙籤飄動。移時莫識。甲乙丙丁。用是綈裘標題。今日先分經史子集。堆之棗几。敢辭鉛槧之功。守作良田。願效挈瓶之智。

塔水場駐防馮君四十壽序

蓋聞崆峒倚劍。天漢投戈。行武不乏英雄。壯志猶推鬢鏢。嗣桓武而媲美。鎮重北門。頌聖考以凝麻。星輝

南極伏惟駐防馮君。世居柏鄉。望出上黨。岐西華胄。舉公沿十五之傳。河北隆名。魏萬分三晉之統。迄洪武而分司西蜀。迨萬曆而移鎮松潘。邊常山之故都。居龍安之屬邑。祖爲副將。賜書爭日月之光。伯授撫夷。秉鉞凜風霜之氣。惟公少懷異質。穎不露于處囊。長擅英姿。才獨精于刀筆。分司塔水。憑眺神泉。陞署彰明。興懷廉讓。持戈殺賊。萑苻之鼠竊皆殲。仗劍驅奸。郭溝之妖氛迅掃。禁博兼之除暴。緝盜卽以安良。他人未能勇行。而公了無畏却。今日堂前進酒。時值強仕之年。他時帳外談兵。預卜遐齡之算。更可喜者。屏開孔雀。光借瓊玉。以相輝。帶縮鴛鴦。並附絲蘿。而共結。宜家宜室。雖離永叶。鸞和而熾。而昌。奕奕長綿。麟趾。且又箕弓。裘冶。欣看繼起之賢。玉樹芝蘭。早發階庭之秀。轅門射戟。爭羨公子登科。泮水生香。咸稱祖宗德慶。際茲乙亥之十月。已週甲子於四旬。遠近鄉紳。咸頌無疆之祉。市廛商賈。共廣難老之章。觀多慶於門闕。三重喜報。懸弧矢于戶牖。五福駢臻。

昭覺寺道院禪師年譜序

蓋聞神通勝業。非定不生。無漏慧根。非靜不發。攝心一處。便是功德叢林。散意片時。卽名煩惱羅刹。然而風裏之燈。影旣不現。波中之月。照豈得明。故降伏四魔。金剛有時。努目慈悲六道。菩薩亦爲低眉。惟我道魁禪師者。家住黃陂。系出童氏。身如明鏡。法號了元。少而精明。夙秉靈慧。長而好道。早悟玄機。耿直居心。有排難解紛之概。剛方自矢。秉鋤強就正之風。謁漢鎮之明師。脫身入定。受明禪之指示。落髮灰心。夜則朗誦曇花。晝則時披貝葉。遂繼領於昭覺。兼開講于草堂。萬化圓通。早受廣師之戒。一塵不染。遂嗣圓悟。

之宗。破巨浪以乘風。兩飛南海之錫。穿雲霧而見日。一了西川之緣。歸來十五春秋。譚經三十六載。雖其人已往。其語猶存。琢句風清。見胷懷之滾滾。浣腸月冷。寫逸興之滔滔。倘非曩之日編。何由綴爲年譜。此釋迦譜系。紀載必出乎衣傳。猶儒氏言行。纂輯多由于門下也。時維秋盡。節界冬初。有宏遠之高徒。託禮汀之令弟。持其兄札。懇乞余文。竊嘗觀其語錄。覽其遺行。實大振乎宗風。因宏開乎象教。立凶年之賑濟。普渡衆生。嚴早暮之戒條。長留規約。重樓疊閣。不惜萬金之費。鑄釜鎔鍋。竟造千僧之灶。又豈徒三乘四諦。探覺性於空虛。五蘊千門。契純真之法界也哉。

附

寄雨村老前輩詩啓

侍讀學士

王懿修
春甫青陽

啓者。記竹林之雅集。曾附濬冲。仰天上之謫仙。羣推太白。頃來雁使。得捧魚牋。知聯語早奉記。曹而扁額。尙邀台命。更荷遠投珠玉。正如親接芝蘭。惠以好音。欣同良覲。伏惟老前輩大人。英辭絢爛。壯氣騰騫。以西蜀之淵雲。爲南宮之冠冕。翰林風月。吏部文章。祕府抽思。固早播詞頭之譽。公庭論事。寧徒署紙尾之名。曾擁節於皇華。旋開堂於綠野。捫參歷井。流水行雲。峻望岷峨。豪情湖海。編玉溪之花萼。記德裕之平泉。鄴架圖書。細參亥豕。膺門賓客。劇會雲龍。崇大雅以扶輪。遍傳詩話。聽康衢之擊壤。亦寓文心。庭自傳經。門多問字。固行樂其多方。抑賦閑之獨異。侍弟僑寓修門。倏臻老境。自慚蒲柳。敢比松筠。謹贖繇韻六章。漫作窠書一幅。相思千里。寓投報之深情。久別十年。思唱酬於往事。溯潞亭之秋水。

許附仙舟對蜀郡之花箋長思彩筆

寄呈雨村老夫子啓

門生

溫承恭莊亭
德慶

啓者竊聞榷枿杞梓材歸削墨引繩。城壁瓊瑣實在收名定價。耀黼黻文章之色。青必出藍。煊彝山粉藻之觀。白當受采。短長合度。玉尺須量。小大皆鳴。金鐘待叩。迄傳書于黃石。橋邊孺子頻來。思問字于元亭。酒畔高軒遙企。伏惟老夫子大人。輪扶大雅。陣鼓雄師。唐宮李嶠司文。晉代山濤啓事。著述罄南山之竹。都鍊京研。聲名高北斗之星。顏陵謝鑠。一枝麟管。校餘七子才華。千仞龍門。分出八廚聲價。鴛鴦繡得。徧度鍼神。荳蔻描來。頻傳花樣。充物溢珊瑚鐵網。璞玉渾金。漑沾流玳瑁書裝。殘膏賸馥。十二閑之驕驄。騏驎施鞭策而盡騁天衢。九萬程之鸞鷲。鵬假羽毛而皆翔日下。出頭放士。宋永叔自古幾人。說項憐才。楊員外當今一个。恭承青袍恨積。紫硯辛穿。長笛一聲。年少則時名謬竊。英才五字。命窮則科第淹遲。積風雲月露于箱中。桃花紙滿。繪草木蟲魚于筆底。艾蒨香薰。自知謫陋堪羞。皇甫謐之擲梨少讀。深慮沉淪可惜。斛律金之勅勒思傳。雖覆甌見輕。挪揄有鬼。豈愈風驚起。賞識無人。史併羅胸。回憶齒牙曩日。己亥。德慶以父父二字命題。荷蒙拔科試直。靈宮第一。文權在手。肯埋頭角斯時。禮易詩書。幾篇帖括。歌行律絕。半冊風騷。走盤而粒粒不圓。珠亦明知九曲。刻楮而硜硜易碎。石偏惜是一卷。水乞剪失吳淞。雲望生于點綴。金淘沙礫。腐化神奇。河東之彭寵懷慙。豕獻白頭。曷貴冀北之孫陽。下淚駒當驟耳。爭傳鼓擊雷門。萬言敢試。評登月旦。一字祈褒。緬私叔于諸人。期有造乎小子。步趨未接。款曲遙通。嗟乎。紅玉

深藏那知太璞。綠珠不嫁。總似無鹽。年年第下劉賁。激昂誰問宦官之策。歲歲放歸韓愈。刺非多咎。貳過之文。倒綉孩兒。雖繡虎而比同續狗。此間僧父。縱雕龍而視若塗鴉。方雄飛豚柵雞棲。久後纔傳其句。陸魯望酒旗風影。當時少羨其才。此不躍不鳴。寒士所以焚囊而感慨。亦一縑一字。古人所以塑像而埋沉者也。嗟乎。象罔今稀。投暗之珠。肇宜祕。豐城人在。埋光之劍。發須干。蓋俗儒惟知引故衡材。而明哲別出風塵。取物序鷓鴣于阮籍。曾聞藻許張華。成鸚鵡于正平。不少狂憐文學。況暗中摸索。年輕曾荷青睛。寧行卷請求。魄落轉施白眼。得一不恨。酣酒常呼。拔十殊多。望塵欲拜。號門生而弗敢。柳州悲憤。壯夫有所不爲。冀豎子之成名。安道游揚。下士聞而大笑。宰相之書不上。我豈妄哉。瓣香之祝。偏般。客何爲者。毋供諧謔。敢布腹心。

寄謝雨村老夫子啓

溫承恭

啓者。竊恭身附青雲。畢生至願。曲孤白雪。屬和終稀。自知卷石殊頑。敢道吐羊可化。誰料解衣見泣。偏容驪驥高呼。吟草收歸詩話之中。墨花並賜錦囊之作。此蓋老夫子大人。栽來桃李。一心護到開花。網過珊瑚。兩眼真知是寶。亭臯木葉。有興頻哦。金屋海棠。無香不笑。集一狐之腋。裁成六尺之衣。修五鳳之樓。採用短長之木。洵嗜痂而有癖。比享帚以何如。喜却生狂。情惡能已。嗟乎。晏元獻禮尊北面。難拔希文。牛僧孺詩謁後塵。不憐禹錫。三都僧父。左思賦笑平原。五色戰場。蘇軾迷慙李薦。恭獨披沙屢揀。敗鼓兼收。風簷擢童穉之文。當年入選。山石拈女郎之句。此日新鑄。姓名附著述而長存。作序之鷓鴣。

弗似詞賦教流傳以共見。能言之鸚鵡皆驚。知己相投。何但磁針芥魄。美人圖報。豈惟玉案金刀。顧明月不見。蛇啣而重山空。令鰲戴腰橫雙劍。不如衰老侯嬴。淚洒一莊。長歎荒涼陸贄。竊白傷矣。尙何言哉。爰思日月推崇。曾見杏壇弟子。因合淵雲作頌。徧徵梅嶺英才。和叶鏗鏘。先唱在陰之鶴。贊邀游夏。略酬顧紐之龜。詞編律絕。歌行譽重。秋陽江漢。雖一坏捧土。何加尼父之山。而萬里揚風。竊播袁宏之扇。伏願老夫子大人。窮憐東野之鳴。甄陶諸子。香敬南豐之祝。眷念鄙人。無力謝青。磨蝎命真可慨。從何表白。靈犀心冀相通。莫云崇奉虛文。所吐無非實語。三薰三沐。倘或傳爲佳話。連篇累牘。珍歸一字一縑。噫。天下文章。歎夫子之不可及。老夫衣鉢。問斯人其誰與歸。

寄呈雨村老夫子遊蜀詩序

溫承恭

僕少負詩名。曾羅二十一史。十六受知于雨村李學憲所錄文有曾羅二十一史之譽。長慙科目。命窮二十五年。羣英壓自考棚。科歲四膺領袖。時藝鑄于試牘。文章屢入選樓。平曹周恭四學憲試皆拔第一。並刊詩文。經術辛勤。敢紆青以自信。遭逢蹇滯。竟脫白之誰憐。蘇東坡未放出頭。良可悲也。李北海爭來識面。能無愧哉。笑彼顏標。豈尙聽冬烘之顛倒。好從校尉。遠思効弓戟。以馳驅中原。當用武之秋。采薇歌作。下士值談兵之會。細柳營開。黑鬪黃巢。寇閔襄陽河內。長蛇封豕。氛連宜漢。褒斜。豫楚巴秦。五路之鼓。鼙並震。旌旗矛戟。兩年之烽。燧頻燃。龍尾占星。籌紛借箸。虎踞踞地。射聽遺書。客有何人。公子新求朱亥。才需此日。趙郊恐失左車。終子雲弃繻出關。請纓確知有路。毛先生處囊脫穎。見未更待何年。倘任嚼字咬文。吟風弄月。遇合乞靈于詞賦。

屈伸聽命于主司。惡知鹽鐵千言。不負寒牕燈火。未必治安六策。終爲用世絲綸。趙南星筆硯欲焚。酸辛涕落。班定遠毛錐不用。踴躍情豪。穀入多年。寧任英雄短氣。材非棄物。那容迂腐噓人。關河倘訪文淵。請聚山川之米。藥石如求仁傑。應登參朮之籠。故險閱蠶叢。不妨裾遠。暫曳而棲。依鷄障。還期有志。竟成。嗟嗟。丈夫坐歎。雄飛誰識。趙溫慷慨。老母寄留。遠志總教。伯約淒涼。萬里奔馳。爾日之熱腸。隱結十年牢落。何時之屯骨。終更魏元。成情托述。懷感慨悲歌。漫道君勿復爾。曹子建表求自試。雄才大略。疇能我駕馭。卿請白臣狂。尙希人諒。

寄呈雨村大人啓

門生

徐組綸

廉生

啓者。恭惟大人。北斗人宗。西川物望。英年對策。雁塔題名。早歲含香。鶴廳聽政。風流儒雅。煥五色之羊城。月旦衡文。探九苞於鳳穴。握金針而造士。秉玉尺以量才。施化雨於南蠻。適觀風乎東粵。焦桐在爨。飾以金徽。枯竹辭亭。珍於玉琯。文眞變豹。士獲登龍。乃以果達。藝之兼得。清慎勤之要。文授武奮。廉車伏觀察之司。義震仁懷。集節寄保釐之任。來蘇是望。方欲穀我以此邦。過化非誣。尙冀借賢於斯地。膺旬宣而疊授。維屏翰而重來。零僭童冠。而乘風門等。游揚之立雪。請業請益。函丈周旋。亦步亦趨。崇塔晉接。事雖希有。願豈全虛。胡乃上官不容。強項遂令下走。竟憚折腰。乘犢駕以返南山。雅耽鉛槧。著鹿皮而歸西蜀。酷嗜縹緗。具論世知人之才。極窮情寫物之識。張敬夫之篋裏。饒有異書。揚子雲之室中。率多奇字。典墳之富。踰彼劉歆。評隲之精。加於荀勗。斯則景星慶雲之覩。目不仰其光儀。鳳凰鸚鵡之

文未足方其品格者也。組輪馬磨寒儒。鷄窗下士。合一十三學之選。倖登於前。領二十八人之班。竊冠

其首。諸生鼓瑟。別技均收。仲氏吹塤。榮施濫及。弟組輪人州。蒙憲取學。敢自號爲佳士。竟肇錫以嘉名。英才區細。

星巖則偏許從遊。憲遊七星巖。星巖。練潭則頻呼唱詠。憲過練潭。題有五言。律句命生舟中。步韻。荆草備籠中之藥。碣砢同席上

之珍。得與語而見知。死何足恨。徒讀書而失業。生亦爲狂。嗟乎。虞翻之骨相偏屯。宏景之頭顱已老。守

青箱於累世。荒豈破天。恃白戰於數科。敗真塗地。得而弗失。氣已竭於再三。蓄而不通。年且惡夫四十。

而且空囊羞澀。併乏一錢。負郭荒涼。曾無二頃。椿樹旣枯於東浙。萱花尙茂乎北堂。卽欲負笈以從。未

能絕裾而出。爰是學詩而呼小子。怨可以羣。繫易以見大人。奇而不偶。腮暴廿載。相逢皆雞肋之棄餘。

舌耕十年。所到等猪肝之是累。深爲自愧。罔藉人憐。然而倒樹朽根。念栽培之有自。攀鱗附翼。欲就正

以無由。乃小阮方栽花於華陽。姪念高。現知華陽縣知縣。而莊亭旋曳裾於梁苑。廩生溫承恭。赴華陽縣署。書呈馬帳。往復僅爾。

忽忽。神溯孔墻。歸來直呈縷縷。五言共獻。俾詩話之咸收。七律遙將。實詞壇之足貴。矚同人以諦視。三

復維般。擲孺子以同觀。一辭莫贊。恨不親聆警效。得以叨附輝光。顧執鞭未服其勞。捧土何加於譽。敬

呈俚句。嗟乎。仲尼之教弟子。大抵詩書禮樂之常。維摩之示文殊。應在文字語言之外。

童山文集補遺卷一

捐修綿州城碑記

從來修城俱無碑。而綿州獨有碑。其故何也。城有定制。凡經建築。非動國家之帑項而難成。其事出於上。故不必以碑記。綿州則城圯已久。又加遷移。必由官民之樂輸。乃易舉。其事出於下。故不可不以碑記也。綿州沿革不常。自隋開皇五年始改西魏之潼州爲綿州。大業三年改金山郡。唐武德初復爲綿。天寶元年改巴西郡。乾元元年復爲綿。其時城池壯固。杜甫詩所謂綿州州府何磊落。顯慶年中越王作也。至宋仁宗時。推官歐陽觀築土城。太守史祁又築城西北以捍涪。刺史程德祥曾作文記其功。然皆土城。明成化初。刺史甯鴻始以石包砌。周九里有奇。高一丈八尺。闊一丈一尺。計一千六百餘丈。門各有樓。宏治中。刺史江洪增修外郭。環以濠。嘉靖間。兵備方任。復修長堤以護城。屹然式廓。明季復毀於賊。已非舊制。本朝康熙三十一年。涪水不歸。昌河突直衝城而過。東北二門。割爲水國。乾隆三十二年。涪水復溢。壞城大半。前知州黃叔顯詳請修築。查從前涪水自州北龍門壩入境。未至州十里。析而爲二。一由北岸龜山脚之宋家營。繞州前與芙蓉溪合。一由南岸烏木椿。遶州後與安昌河合。前後二水均匯於南塔山下之老鷹灘。曲折而東。此時若欲修築舊城。恐涪水兩路夾衝。旋補旋溢。勞費無功。良不易也。今自康熙冲決後。涪水全勢盡由宋家澳。一直南趨。而東北一帶。刷成河道。昔年冲塌城基。現沒江心。卽今廟基嘴灘地勢。

反居窪下。其西南岸。雖屬臨河。尙寬五百餘丈。形如壁立。而望江樓一帶。水勢俱屬洄流。地亦高爽。永難冲激。雖舊制稍改。形勝猶全。富樂之勝依然。鶉首之星如故。止須彌縫其闕。依然一大都會。乃不此之圖。而議建議遷。毫無定見。忽於三十四年。詳明前督阿。奏准裁汰羅江。改移州治。既不相度形勢。又不細察民情。以羅爲綿。已屬張冠李戴。以州改驛。未免主弱臣強。豈不惜哉。吾州尊劉公者。諱印全。字慕陔。江南常州武進人。乾隆壬辰進士也。由資陽令陞合州。復由合擢綿州。初下車。卽絕苞苴。嚴賊盜。萬民乂安。但以羅去舊綿太遠。每有鞭長莫及之歎。而亦無可如何。嘉慶五年正月。教匪卒起。偷渡嘉陵江。二月。漸逼潼綿。公聞報。卽率鄉勇。趨至金山驛。晝夜堵禦。寢食俱廢。又見城垣破落。卽日稟請大憲。倡捐銀一千兩。米五百石。卽於十四日動工。一時輿情躍踊。鳩工運石。無不奮臂爭先。予時方避寇成都。見公與趙太守書。議築綿城堵賊一事。嘆曰。予固知移州之非計也。旣聞四鄉士民。陸續捐輸。計銀四萬餘兩。不匝月而功成。時烽火已近北岸。百姓紛紛攜家進城。幾至人滿。總督大營亦移住金山驛。對江逃民。呼號喚渡者。萬餘人。公請救之。大憲疑賊雜其中。公毅然自任。親自過江。拿篙驗渡。俱令過江避賊。民皆大悅。呼爲劉青天。余嘗詠其事云。百堞能容千戶住。一航先救萬人生。蓋紀實也。未幾。德將軍參贊兵至。擒獲賊首。解省寸磔。餘賊見金山院守嚴密。不敢過涪江。從泰和鎮偷渡。四月初三日。賊被德兵追回。亦不敢過金山。從下流楊家灘。泗江而遁。淹斃甚多。城遂保全。皆劉公力也。先是以綿移羅。以至官無正印。迄今三十年來。綿人無日不思復舊。至是士民立意請印官回綿。慮及長久。加開甃砌。至十月完工。崇墉堅固。又於城

外用石添築大堤。渡口釘砌人字小堤。俱增魚嘴。重重保護。周圍共築城。計九百八十餘丈。高一丈九尺。俱係石砌。城樓四座。河堤計長六百餘丈。寬九十丈。高一丈二尺。共捐銀六萬餘兩。士民郭大申等。卽於是月具呈而復州治。懇印官回駐舊州。而新綿州士民。亦以草創之堡。不及帑修之城。爲堅固。懇請勿移。各赴大憲爭訟。竊思先王設城以守險。必居扼要之地。綿州在險關之南。自過嘉陵江。卽以劍關爲全蜀鎖鑰。所謂一夫當關。萬夫莫開也。劍關至綿州三百餘里。其險與劍關等。然劍關之險。險在山。綿州之險。險在江。江爲天塹。上通龍安隴西。下通三江兩湖。舳艫千里。人烟萬戶。水陸交通。百貨彙集。故論關勢。生成則綿不如劍。論江形險阻。則劍不如綿。譬之居家。然舊綿門戶也。新綿堂奧也。譬之人身。然舊綿咽喉也。新綿肺腑也。防賊者有不先守門戶而使賊入室乎。欲食者有不先進咽喉而能使食入腹乎。必無此理矣。舊綿民執此理以爭。故新綿民終不能奪。旋經大憲批布。按二司核議。併批州確勘詳覆。而州尊亦兩無所偏。據理詳請。使州仍歸綿。縣仍歸羅。懇大憲奏改。以息爭端。時六年六月初五日。適原任藩憲和公寧由藏回京。道過金山驛。舊綿民復攔輿呈請轉奏。仍歸舊治。和公當卽登城察驗。見丁男百工。雲集城頭。俱用方石合縫堅牢。女牆亦一律完整。平岡纒繞。約二百里。似天然城郭。又見衙署壇廟俱全。無庸另建。其應修處。據士民等眼同本州勘估。俱願捐資修理。不敢絲毫請動帑項。和公面允代奏。七月初七日。據情人告。維時全蜀寧靜。秦楚沿邊教匪漸已搜索靡遺。大營正在奏籌善後事宜。二十一日。奉廷寄。准歸入此案辦理。十一月二十一日。參贊德。總督勒等。合奏。因地制宜。請將達州改府。以杜後患。併請綿

州州判。仍移駐豐谷井。其綿州知州。仍回舊州。羅江縣。請將保縣。裁入理番同知。仍復羅江舊縣。其餘武職文員。量加添改。一併分別奏請。設官以便彈壓等因。奉硃批。軍機大臣會同該部。速議具奏。經大學士慶覆議。俱如所請。二十六日。奏奉旨依議。又夾片。改達州爲綏定府。七年二月初十日。奉到部文。自是綿州。羅江。俱經改定。各回舊地。新任各官。俱於六月中旬。擇日上任。先是。署知縣陳公啓泰。到羅江新任。然後劉公到綿州新任。是日。綿民傾城出迎。歡欣歌舞。父老壺漿。兒童竹馬。彩棚錦帳。鼓吹沸天。袤延數十里。士女來觀者。幾至肩摩。擊花團錦簇。自來良吏之得民心。未有如此者。惜予年至七十。不及扶杖來遊。以觀太平之盛事也。劉公自到任後。復親身相度城工。時值青黃不接。見民捐實不敷用。復自捐廉三千金。籌款三千貫。發交管局紳士。陸續支用。士民等見工費浩繁。復續捐連腳銀四千兩。以資接濟。九月初一日。劉公據紳士意。遣人以書來。屬爲碑記。以識顛末。並言曰。此役也。士民捐資。數逾累萬。其間有獨力捐資者。有總辦局務者。有分管工段者。急工趨事之誠。誠不可沒。職叨守土。諸凡分所當爲。斷不敢貪衆人之功。以爲己力。此意尤望鑒及。嗟乎。何其謙也。夫州縣沿革。事所常有。今舊治城於倉猝之間。締造歷三年之久。名爲復舊。實則剏始。雖士民同心。用底於成。然非公爲之倡。身先士卒。恐樂輸者。未必遂至於七八萬兩。而公亦前後捐輸。籌撥錢米。幾至七八千兩。官無請帑之煩。民無怨讟之語。急則搶修堵衛。緩則保固金湯。古云。能禦大災。捍大患。有功德於民者。非公而誰。昔晉賈逵。領豫州牧。開渠通運。河以利民。人謂之賈侯渠。今公領綿州牧。築城以衛民。然則此城。卽謂之爲劉公城可也。識者當不易吾言。所有

紳士諸名並隨公後。勒諸貞石。用垂萬古。

前日接展復函。知修復州城碑記。已蒙老先生見允。欣喜之至。方謂十日一水。五日一石。能事不受促迫。昨弟於鄉間勘驗回署。而令甥冉孝廉。已贖持尊作見示。弟當卽展讀。於綿州情形之扼要。城堤剏建之原委。殫見洽聞。如燭照計數。而文筆蒼勁。沙瀚如幽燕。老將據鞍矍鑠。餘勇可賈。又如江濤澎湃。沙石魚龍與流俱下。足徵名下無虛。敬佩。敬佩。弟劉印全。

